

萬有文庫

第一集一千種

王雲五主編

王臨川集

(五)

王安石著



商務印書館發行

萬有文庫

第一集一千種

總編纂者

王雲五


商務印書館發行



臨川先生文集

(五)

王安石著



國學基本叢書

上海圖書館藏書



A541 212 0004 0765B

# 臨川先生文集

## 卷四十一

劄子

擬上殿劄子

臣蒙恩奉使歸報陛下。敢因邊事之所及。冒言天下之事。伏惟陛下詳思而擇其中。天下幸甚。臣竊見陛下有恭儉之德。有聰明睿智之才。有仁民愛物之意。顧內不能無以社稷爲憂。外則不能無患於夷狄。天下之才力日以窮困。而風俗日以衰壞。四方有智之士。慄慄然常恐天下之不久安。此其故何也。患在無法度故也。今朝廷法嚴令具。無所不有。而臣以謂無法度者。方今之法度多不合於先王之法度故也。孟子曰。有仁心仁聞。而人不被其澤者。爲政不法先王之道故也。非此之謂乎。以今之時。方先王之時。遠矣。所遭之時。所遇之變。不同。而欲一二修先王之政。雖甚愚者。猶知其難也。而臣以謂當今之失。患在不法先王之政者。以謂當法其意而已。夫五帝三王相去。蓋千有餘歲。一治一亂。盛衰之時具矣。其所遭之變。所遇之勢不同。其施設之方亦皆殊。而其爲國家之意。本末先後。未嘗不同也。臣故曰。當法其意而已。法其意。則吾所改易更革。不至乎傾駭天下之耳目。囂天下之口。而固已合乎先王之政矣。雖然。以方今之勢。揆之陛下。雖欲改易更革天下之事。合於先王之意。其勢未必能也。陛下有恭儉之德。有聰明睿知之才。有仁民愛物之意。則何爲而不成。何欲而不得。而臣固以謂雖欲改易更革天下之事。合於先王之意。

其勢未必能者何也。方今天下之吏才少故也。朝廷之人才固嘗簡在陛下之聰明。以臣使事之所及。則一路數千里之間。能推行朝廷之法。知其所緩急。而一切能修其職事者甚少。而不才苟簡貪鄙之人。至不可勝數。其能講先王之意。以合當世之變者。蓋闔郡之間。往往而絕也。夫人才不足。則陛下雖欲改易更革天下之事。以合先王之意。大臣雖有能當陛下之意。而領此者。九州之大。四海之遠。萬官之衆。孰能一二推行之。使人人蒙其施者乎。臣故曰。其勢未必能也。然則方今之急。在乎人才而已。今之天下。亦先王之天下。先王之時。人材嘗衆矣。蓋其所以陶冶而成之者有道。所謂陶冶以成之者。詩書傳記之所載。其大略可見矣。陛下嘗試詳延大臣左右及天下智能才諳之士。使其論先王所以成天下之才者。其設施之方如何。今之所以異於先王而人才不足者。其咎安在。其欲變而通之。以合於先王之意。而成天下之才。宜何施爲。而可。陛下因擇其言之近於理者。使之相與上下反覆爲論焉。因取其宜於時者施焉。則人才宜衆矣。夫成人之才甚不難。人所願得者尊爵厚祿。而所榮者善行。所恥者惡名也。今操利勢以臨天下之士。勸之以其所榮。而予之以其所願。則孰肯背而不爲者。特患不能爾。而吾所以責之者。又中人之所能爲。則不能者又少矣。夫成人之才甚不難。而自古往往不能成人之才何也。以人主之才不足故也。蓋人主無恭儉之德。無聰明睿智之才。無仁民愛物之意。則嬖倖諂諛。姦蔽欺殘。賊放恣之人。皆得志於時。而推其類以亂天下。雖有良法。不能成天下之才矣。今陛下有恭儉之德。有聰明睿智之才。有仁民愛物之意。而又因天下之所願。以爲輔相者。公聽並觀。以進退天下之士。則所以成天下之才。特患無良法。而陛下推至誠惻怛之心以行之。則臣雖愚。固知人之才不難成也。人才旣衆。則陛下何爲而不成。

何欲而不得。夫然後改易更革天下之事以合乎先王之意甚易也。陛下不能如此。苟於積敝之末流。因不足任之才。而修不足爲之法。臣恐在軍者日以勞。而士民愈以窮困汙濫。而於天下國家愈其無補也。臣幸以使事歸報。徒舉利害之一二。而無補於世。非臣之所以事陛下。惓惓之義也。輒不自知其驚下。而敢言國家之大體。伏惟陛下詳擇其中。天下幸甚也。

### 上五事劄子

陛下卽位五年。更張改造者數千百事。而爲書具爲法立。而爲利者何其多也。就其多而求其法最大其效最晚。其議論最多者。五事也。一曰和戎。二曰青苗。三曰免役。四曰保甲。五曰市易。今青唐洮河幅員三千餘里。舉戎羌之衆二十萬。獻其地。因爲熟戶。則和戎之策已效矣。昔之貧者舉息之於豪民。今之貧者舉息之於官。官薄其息。而民救其乏。則青苗之令已行矣。惟免役也。保甲也。市易也。此三者。有大利害焉。得其人而行之。則爲大利。非其人而行之。則爲大害。緩而圖之。則爲大利。急而成之。則爲大害。傳曰。事不師古。以克永世。匪說攸聞。若三法者。可謂師古矣。然而知古之道。然後能行古之法。此臣所謂大利害者也。蓋免役之法。出於周官所謂府史胥徒。王制所謂庶人在官者也。然而九州之民。貧富不均。風俗不齊。版籍之高下不足據。今一旦變之。則使之家至戶到。均平如一。舉天下之役。人人用募。釋天下之農。歸於畎畝。苟不得其人而行。則五等必不平。而募役必不均矣。保甲之法。起於三代丘甲。管仲用之。齊子產用之。鄭商君用之。秦仲長統言之。漢而非今日之立異也。然而天下之人。鳧居鴈聚。散而之四方。而無禁也者。數千百年矣。今一旦變之。使行什伍相維。鄰里相屬。察姦而顯諸仁。宿兵而藏諸用。苟不得其人而行。

之。則搔之以追呼。駭之以調發。而民心搖矣。市易之法。起於周之司市。漢之平準。今以百萬緡之錢。權物價之輕重。以通商而貫之。令民以歲入數萬緡息。然甚知天下之貨賄未甚行。竊恐希功幸賞之人。速求成效於年歲之間。則吾法墮矣。臣故曰。三法者。得其人。緩而謀之。則爲大利。非其人。急而成之。則爲大害。故免役之法成。則農時不奪。而民力均矣。保甲之法成。則寇亂息。而威勢彊矣。市易之法成。則貨賄通流。而國用饒矣。

議入廟劄子

臣今日曾公亮傳聖旨。以臣寮上言郊祀不當入廟。令臣詳議。臣愚以爲制天下之事。當令本末終始相稱。今旣奉先帝遺詔。外行以日易月之禮。又諸所以崇事祖宗。皆循本朝制度。獨於入廟。則欲變先帝故事。而遠從三代之禮。臣恐於事之本末終始。不爲相稱。必欲盡除近世之制度。一以三代爲法。則今陛下尙在諒陰之中。非可以制禮之時。且言者以爲喪三年。不祭於廟。禮也。而今乃欲令公卿代告。此何禮也。臣竊以爲今之禮。不合於三代者多矣。言者不以爲非。而專疑不當入廟者。蓋於所習見。則安於所罕見。則怪。恐不足留聖聽也。臣學術淺陋。誤蒙訪逮。敢不盡愚。取進止。

言尊號劄子 庚戌六月七日

臣伏以陛下緝熙光明。如日之方升。布利施澤。如川之方至。號名於實。豈能有所增加。輒復卷卷。妄有陳請。徒以祖宗故事。適在此時。臣子之心。懷不能已。陛下受而不拒。足以俯順人心。臣獨不能無疑者。陛下以西垂之勞。方以過爲在己。遽膺徽冊。似或未安。臣等以歸美爲忠。陛下以撝謙爲德。布之海內。誰曰不

然。伏惟聖心更賜詳酌。

### 論罷春燕劄子

臣竊以邊夷外畔。士卒內潰。吏民騷動。死傷接踵。恐非燕而用樂之時。且此月休假已多。又加兩日。卽恐急奏或致留滯。臣愚謂宜罷燕以副聖心仁惻。且不妨應接機速公事。如蒙省察。乞賜中旨施行。

### 論館職劄子二道

臣伏見今館職一除。乃至十人。此本所以儲公卿之材也。然陛下試求以爲講官。則必不知其誰可。試求以爲監司。則必不知其誰可。此患在於不親考試以實故也。孟子曰。國人皆曰賢。然後察之。見賢焉。然後用之。今所除館職。特一。二大臣以爲賢而已。非國人皆曰賢。國人皆曰賢。尙未可信用。必躬察見其可賢而後用。況於一。二大臣以爲賢而已。何可遽信而用也。臣願陛下察舉衆人。所謂材良而行美。可以爲公卿者。召令三館祇候。雖已帶館職。亦可令兼祇候。事有當論議者。召至中書。或召至禁中。令具條奏。是非利害及所當施設之方。及察其才可以備任使者。有四方之事。則令往相視問察。而又或令參覆其所言是非利害。其所言是非利害。雖不盡中義理。可施用。然其於相視問察。能詳盡而不爲蔽欺者。卽皆可以備任使之才也。其有經術者。又令講說。如此至於數四。則材否略見。然後罷其否者。而召其材者。更親訪問以事。訪問以事。非一事而後可以知其人之實也。必至於期年。所訪一。二十事。則其人之賢不肖審矣。然後隨其材之所宜任使。其尤材良行美可與謀者。雖嘗令備訪問可也。此與用一。二大臣薦舉。不考試以實。而加以職。固萬萬不侔。然此說在他時或難行。今陛下有堯舜之



明洞見天下之理。臣度無實之人不能蔽也。則推行此事甚易。既因考試可以出材實。又因訪問可以知事情。所謂敷納以言。明試以功。用人惟己。闢四門。明四目。達四聰者。蓋如此而已。以今在位乏人。上下壅隔之時。恐行此不宜在衆事之後也。然巧言令色。孔壬之人。能伺人主意所在。而爲傾邪者。此堯舜之所畏。而孔子之所欲遠也。如此人當知而遠之。使不得親近。然如此人亦有數。陛下博訪於忠臣良士。知其如此。則遠而弗見。誤而見之。以陛下之仁聖。以道揆之。以人參之。亦必知其如此。知其如此。則宜有所懲。如此則巧言令色。孔壬之徒。消而正論不蔽於上。今欲廣聞見。而使巧言令色。孔壬之徒得志。乃所以自蔽。畏巧言令色。孔壬之徒爲害。而一切疏遠羣臣。亦所以自蔽。蓋人主之患在不窮理。不窮理則不足以知言。不知言則不足以知人。不知人則不能官人。不能官人則治道何從而興乎。陛下堯舜之主也。其所明見。秦漢以來欲治之主。未有能彷彿者。固非羣臣所能窺望。然自堯舜文武皆好問。以窮理。擇人而官之。以自助。其意以爲王者之職。在於論道。而不在於任事。在於擇人而官之。而不在於自用。願陛下以堯舜文武爲法。則聖人之功。必見於天下。至於有司叢脞之務。恐不足以棄。日力勞聖慮也。以方今所急爲在如此。敢不盡愚。臣愚才薄。然蒙拔擢。使豫聞天下之事。聖旨宣諭富弼等。欲於講筵。召對輔臣。討論時事。顧如臣者。材薄不足以望陛下之清光。然陛下及此言也。實天下幸甚。自備位政府。每得進見。所論皆有司叢脞之事。至於大體。粗有所及。則迫於日晷。已復旅退。而方今之事。非博論詳說。令所改更。施設本末。先後小大。詳略之方。已熟於聖心。然後以次奉行。則治道終無由興起。然則如臣者。非蒙陛下賜之從容。則所懷何能自竭。蓋自古大有爲之君。未有不始於憂勤。而終於逸樂。今陛下仁聖之質。秦漢以來。

人主未有企及者也。於天下事又非不憂勤。然所操或非其要。所施或未得其方。則恐未能終於逸樂。無爲而治也。則於博論詳說。豈宜緩。然陛下欲賜之從容。使兩府並進。則論議者衆而不一。有所懷者。或不得自竭。謂宜使中書密院迭進。則人各得盡其所懷。而陛下聽覽亦不至於煩。陛下卽以臣言爲可。乞明諭大臣。使各舉所知。無限人數。皆實封以聞。然後陛下推擇召置。以爲三館祇候。其不足取者。旋即罷去。則所置雖多。亦無所害也。

二

臣伏見某人云云。皆衆人所謂材良行美。宜蒙陛下訪問任使者。凡此九人。臣或熟聞而未識。或熟識而未敢任。或敢任其可以爲公卿。臣雖未識。然衆人之所謂賢。臣不敢蔽也。臣雖敢任其可以爲公卿。然陛下不親見其可賢。亦難遽信而用。若陛下以臣前所論奏爲合於義理。卽乞悉置此九人者。以爲三館祇候。親考試其材行。若不可用。旋即罷去。若其可用。然後留備訪問任使。如此則所置雖多。未有濫得官職者。然此但臣一人所聞所知。恐執政大臣各有所聞所知。陛下若令各舉所聞所知。而如此考試。庶幾人材無所遺逸。經曰。舉逸民。天下之民歸心焉。善人君子者。天下之民心所願舉。欲其延問視其所在而從之者也。陛下卽位已來。以在事之人。或乏材能。故所拔用者。多士之有小材而無行義者。此等人得志。則風俗壞。風俗壞。則朝夕左右者。皆懷利以事陛下。而不足以質朝廷之是非。使於四方者。皆懷利以事陛下。而不可以知天下之利害。其弊已效見於前矣。恐不宜不察也。欲救此弊。亦在親近忠良而已。伏惟陛下仁聖已深察此理。臣愚猶敢及此者。忠臣惓惓之義也。

本朝百年無事劄子

臣前蒙陛下問及本朝所以享國百年天下無事之故。臣以淺陋。誤承聖問。迫於日晷。不敢久留。語不及悉。遂辭而退。竊惟念聖問及此天下之福。而臣遂無一言之獻。非近臣所以事君之義。故敢昧冒而粗有所陳。伏惟太祖躬上智獨見之明。而周知人物之情僞。指揮付託。必盡其材。變置施設。必當其務。故能駕馭將帥。訓齊士卒。外以扞夷狄。內以平中國。於是除苛賦。止虐刑。廢強橫之藩鎮。誅貪殘之官吏。躬以簡儉爲天下先。其於出政發令之間。一以安利元元爲事。太宗承之以聰武。真宗守之以謙仁。以至仁宗英宗。無有逸德。此所以享國百年而天下無事也。仁宗在位。歷年最久。臣於時實備從官。施爲本末。臣所親見。嘗試爲陛下陳其一二。而陛下詳擇其可。亦足以申鑒於方今。伏惟仁宗之爲君也。仰畏天。俯畏人。寬仁恭儉。出於自然而忠恕誠懇。終始如一。未嘗妄興一役。未嘗妄殺一人。斷獄務在生之。而特惡吏之殘擾。寧屈已棄財於夷狄。而終不忍加兵。刑平而公。賞重而信。納用諫官御史。公聽並觀。而不蔽於偏至之讒。因任衆人耳目。拔舉疎遠。而隨之以相坐之法。蓋監司之吏。以至州縣。無敢暴虐殘酷。擅有調發。以傷百姓。自夏人順服。蠻夷遂無大變。邊人父子夫婦得免於兵死。而中國之人安逸蕃息。以至今日者。未嘗妄興一役。未嘗妄殺一人。斷獄務在生之。而特惡吏之殘擾。寧屈已棄財於夷狄。而不忍加兵之效也。大臣貴戚左右近習。莫敢強橫犯法。其自重慎。或甚於閭巷之人。此刑平而公之效也。募天下驍雄橫猾。以爲兵。幾至百萬。非有良將以御之。而謀變者輒敗。聚天下財物。雖有文籍委之府史。非有能吏以鈎考。而斷盜者輒發。凶年饑歲。流者填道。死者相枕。而寇攘者輒得。此賞重而信之效也。大臣貴戚左右近習。莫

能大擅威福。廣私貨賂。一有姦慝。隨輒上聞。貪邪橫猾。雖間或見用。未嘗得久。此納用諫官御史公聽並觀而不蔽於偏至之讒之效也。自縣令京官以至監司臺閣陞擢之任。雖不皆得人。然一時之所謂才士亦罕蔽塞而不見收舉者。此因任衆人之耳目拔舉疎遠而隨之以相坐之法之效也。升遐之日。天下號慟如喪考妣。此寬仁恭儉出於自然忠恕誠懇終始如一之效也。然本朝累世因循末俗之弊。而無親友羣臣之議。人君朝夕與處。不過宦官女子出而視事。又不過有司之細故。未嘗如古大有爲之君與學士大夫討論先王之法以措之天下也。一切因任自然之理勢。而精神之運有所不加。名實之間有所不察。君子非不見貴。然小人亦得廁其間。正論非不見容。然邪說亦有時而用。以詩賦記誦求天下之士。而無學校養成之法。以科名資歷敍朝廷之位。而無官司課試之方。監司無檢察之人。守將非選擇之吏。轉徙之亟。旣難於考績。而游談之衆。因得以亂真。交私養望者多得顯官。獨立營職者或見排沮。故上下偷惰取容而已。雖有能者在職。亦無以異於庸人。農民壞於繇役。而未嘗特見救恤。又不爲之設官。以修其水土之利。兵士雜於疲老。而未嘗申勅訓練。又不爲之擇將。而久其疆場之權。宿衛則聚卒伍無賴之人。而未有以變五代姑息羈縻之俗。宗室則無教訓選舉之實。而未有以合先王親疎降殺之宜。其於理財大抵無法。故雖儉約而民不富。雖憂勤而國不強。賴非夷狄昌熾之時。又無堯湯水旱之變。故天下無事。過於百年。雖曰人事亦天助也。蓋累聖相繼。仰畏天。俯畏人。寬仁恭儉。忠恕誠懇。此其所以獲天助也。伏惟陛下躬上聖之質。承無窮之緒。知天助之不可常恃。知人事之不可怠終。則大有爲之時。正在今日。臣不敢輒廢將明之義。而苟逃諱忌之誅。伏惟陛下幸赦而留神。則天下之福也。取進止。

卷四十二

劄子

相度牧馬所舉薛向劄子

臣等竊觀自古國馬盛衰皆以所任得人失人而已。汧渭之間未嘗無牧而非子獨能蕃息於周。河隴之間未嘗無牧而張萬歲獨能蕃息於唐。此前世得人之明效也。使得人而不久其官久其官而不使得專其事使得專其事而不臨之以賞罰亦不可以成功。今臣等相度陝西一路買馬監牧利害大綱已具奏聞。伏見權陝西轉運副使薛向精力強果達於政事。河北便糴陝西榷鹽皆有已試之效。今來相度陝西馬事尤爲詳悉。臣等前奏已乞就委薛向提舉陝西買馬及監牧公事。今欲乞降指揮許令久任。緣今來馬價多出於解池鹽利三司所支銀紬絹等。又許令於陝西轉運司兌換見錢。今薛向既掌解鹽又領陝西財賦則通融變轉於事爲便。兼臣等訪問得薛向陝西係官空地可以興置監牧處甚多。若將來稍成次第卽可以漸興置。蓋得西戎之馬牧之於西方不失其土性一利也。因未嘗耕墾之地無傷於民二利也。因向之材而就令經始三利也。又河北有河防塘泊之患而土多烏鹵不毛戎馬所屯地利不足。諸監牧多在此路所占草地多是肥饒而馬又不堪未嘗大段孳息。若陝西興置監牧漸成次第卽河北諸監有可存者悉以陝西良馬易其惡種有可廢者悉以肥饒之地賦民於地不足而馬所不宜之費以肥饒之地賦民而收其課租以助戎馬之費於地有餘而馬所宜之處以未嘗耕墾之地牧馬而無傷於民。此



又利之大者也。如允臣等所奏，卽乞辭向所奏舉官員，及論改舊弊，朝廷一切應副，成功則無愛賞，敗事則無憚罰。如此則臣等保任，辭向必能上副朝廷改法之意。如將來敗事，臣等各甘同辜，取進止。

### 論許舉留守令勅劄子

臣伏奉今月二十九日中書降到勅語，諸州知州、知軍、知縣令內，有清白不擾，而政迹尤異，實惠及民，有如係三周年或三十個月替到任已及成資，係二周年替到任已及一年已上，其知州、軍許本路安撫轉運使、副判官提點刑獄、知縣、縣令，卽更與本處知州、軍通判並連署同舉保舉再任，仍須於奏狀內將本官到任以來政迹可紀實狀一一條列，奏委中書門下更加察訪，如不是妄舉，卽進呈取旨。當議量所述政迹及合入資序，推恩許令再任，令臣撰勅辭者，臣竊以謂朝廷欲使令守之宜民者久於其官，誠亦方今政務之先急。然勅意有於方今事變尙未合者。今審官除知州、軍皆待一年八月闕，知縣、縣令亦大抵待闕一年以上。今若使係三年及三十月替者，須候成資方得舉留再任。比及朝廷報許，卽其人係三十月替者，已及替期，係三年替者，亦已去替期不遠，待闕之人，亦已赴任。雖未赴任，亦多已待闕一年。方復使之還就審官，別求差遣，卽於人情有所未安。兼朝廷欲使守令久於其官，爲其自知勢可以久，則果於有爲，而又上下相安，莫有苟且之意，則必候成資然後許之再任。孰若一年以上卽皆許之舉留，如此則已除待闕之人，免往返之勞弊，而被留之守令，又早自知其當久，而於興利除害敢有所爲。所有勅詞，臣雖已具草，如以臣議爲允，只乞於所降勅語內，除去如係三周年或三十個月替到任已及成資，係二周年替二十二字，取進止。

乞朝陵劄子

臣當仁宗皇帝英宗皇帝遷坐之時。方以遭喪疾病在外。今蒙召還。復備從官。伏見朝廷將命官朝拜諸陵。臣欲備使。冀得少紓螻蟻區區感慕之情。伏望聖慈特賜矜許。取進止。

乞免修實錄劄子

臣准閣門報勅。差臣與吳充同修英宗皇帝實錄。竊緣臣於吳充爲正親家。慮有共事之嫌。今來實錄院止闕呂公著一人。臣於討論綴緝。不如吳充精密。若止差吳充一人以代公著。自足辦事。伏望聖恩詳酌指揮。所有勅牒。臣未敢受。取進止。

乞改科條制劄子

伏以古之取士。皆本於學校。故道德一於上。而習俗成於下。其人材皆足以有爲於世。自先王之澤竭。教養之法無所本。士雖有美材。而無學校師友以成就之。議者之所患也。今欲追復古制。以革其弊。則患於無漸。宜先除去聲病對偶之文。使學者得以專意經義。以俟朝廷興建學校。然後講求三代。所以教育選舉之法。施於天下。庶幾可復古矣。所對明經科。欲行廢罷。并諸科元額內。解明經人數。添解進士。及更俟一次科場。不許新應諸科人投下文字。漸令改習進士。仍於京東陝西河東河北京西五路。先置學官。使之教導。於南省所添進士奏名。仍具別作一項。止取上件。京東等五路應舉人。并府監諸路。曾應諸科。改應進士人數。所貴合格者多。可以誘進諸科嚮習進士科業。如允所奏。乞降勅命施行。

廟議劄子

准中書門下奏准治平四年閏三月八日勅。遷僖祖廟主藏之夾室。臣等聞萬物本乎天。人本乎祖。故先王廟祀之制。有疏而無絕。有遠而無遺。商周之王。斷自稷契以下者。非絕譽以上遺之。以其自有本統承之故也。若夫尊卑之位。先後之序。則子孫雖齊。聖有功。不得以加其祖考。天下萬世之通道也。竊以本朝自僖祖以上。世次不可得而知。則僖祖有廟。與稷契疑無以異。今毀其廟而藏其主夾室。替祖考之尊。而下附於子孫。殆非所以順祖宗孝心。事亡如事存之義。求之前載。雖或有然。考合於經。乃無成憲。因情制禮。實在聖時。伏惟皇帝陛下。仁孝聰明。紹天稽古。動容周旋。惟道之從。宗祀重事。所宜博考。乞以臣等所奏。付之兩制。詳議而擇取其當。

### 議服劄子

先王制服也。順性命之理而爲之節。恩之深淺。義之遠近。禮之所與奪。刑之所生殺。皆於此乎權之。傳曰。三年之喪。未有所從來者也。蓋期年及緦麻。緣是以爲衰。而其輕重遲速之制。非得與時變易。唯貴之於賤。或降或絕。或否。蓋在先王之時。諸侯大夫各君其父兄。欲尊尊之義有所伸。則宜親親之恩有所屈。此其所以降絕之意也。自封建之法廢。諸侯大夫降絕之禮。無所復施。士大夫無宗。其適孫傳重之屬。不可純用周制。臣愚以謂方今惟諸侯大夫降絕之禮可廢。而適子死非傳爵者。無衆子。乃可於適孫承重。自餘喪服。當用周制而已。何則。先王制服。三年之喪。以爲差。非得與時變易故也。然自秦漢以來。言禮者或失經旨。而歷代承用。傳守至今。與夫近世改制。亦皆有說。非以義折衷則不明。故臣於所欲定。則爲議以辯之。末學寡陋。獨用己見。決千歲以來之所惑。恐不能盡伏。乞以付學士大夫博議。令臣得與反復。

議南郊三聖並侑劄子

臣等聞推尊尊以享帝。義之至。推親親以享親。仁之極。尊尊不可以瀆。故郊無二主。親親不可以僭。故廟止其先。今三后並配。欲以致孝也。而適所以瀆乎享帝。後宮有廟。欲以廣恩也。而適所以僭乎享親。推存事亡。則非所以寧親也。臣等今詳議。欲乞各如禮官所議。

議郊祀壇制劄子

先王所以交於神明。壇坎牲幣器服。時日形色度數。莫不依其象類。易曰。一陰一陽之謂道。乾陽物也。坤陰物也。冬至祀天於地上之圓丘。所謂爲高。必因丘陵。而因天事天也。夏至祭地於澤中之方丘。所謂爲下。必因川澤。而因地事地也。蓋陽以圓爲形。其性動。陰以方爲體。其性靜。天陽而動。故祀於地上之圓丘。而禮神以蒼璧。璧亦圓也。地陰而靜。故祭於澤中之方丘。而禮神以黃琮。琮亦方也。合祀天地爲圓壇。而於國陽之地上。豈聖人以類求神之意哉。熙寧郊儀。祭皇地示壇八角。祭神州地示壇廣四十八步。高五尺。今則變方爲圓壇。神州築方壇。而復無坎。皆不應禮。伏請皇地示神州地示爲方壇。壇之外爲坎。庶協古制。

議郊廟太牢劄子

謹按禮記王制。祭宗廟之牛角握。周禮小司徒。凡小祭祀奉牛牲入。古者諸侯五廟。祔祠烝嘗。每廟一太牢。大夫三廟。有天子之大夫。故曰大夫用索牛。謂之索者。求得而用之。但不在滌而已。諸侯之祔祭用太牢。吉祭則少牢。自諸侯與天子之大夫時祭用牲如此。然則天子之祭用牛者可知矣。唐郊祀并宗廟社

稷等祭。悉用太牢。其後稍易舊制。九廟時享有攝事。共用一犢。國朝開寶初。冬至親郊。詔有司宗廟共用一犢。一郊壇用犢三。又詔其常祀惟昊天上帝用犢。自餘大祀。悉以羊豕代之。嘉祐中。仁宗親祫。卽每室用太牢。自餘三年親祀。八室共用一犢。有司攝事。惟以羊豕。記曰。先王之制禮也。不可多也。不可寡也。唯其稱也。是故君子大牢而祭。謂之禮。曰。君子謂大夫以上也。夫以天下奉其祖禰。而廟享牲牢。用過乎儉。不可謂稱。今三年親祠。而八室共用一犢。及祫享盛祭。有司攝事。而少牢則非稱。欲乞三年親祠。并食饗。有司攝事。伏請太廟每室並用太牢一。貼黃竊恐朝廷以牛數多。或乞時饗。且仍舊制。右奉聖旨。唯親祠並祫享。每室用太牢。

### 議皇地示神州地示不合燎燔事劄子

伏爲北郊所祭皇地示。並神州地示。祗合坎瘞。自來卻如祭天升煙之義。別建一壇。燔祝版。臣昨累次具狀奏聞。乞行改正。雖蒙聖旨下有司詳定。又緣所定壇壝儀注條件不少。考求典故。未能遽革。伏覩今月二十一日神州地示。亦依襲故常。泥飾壇燎。依舊行事。臣昨亦備述自古以來祭祀皆爲瘞坎。蓋取就下求陰之義。及考先儒所祭地示。卽無標燎之文。伏覩國朝祀儀所載祀辭。亦曰瘞儀。卻行燔燎之禮。顯是從來差錯。恐瀆於神。欲乞不候議定。諸壇壝等制度。先次考正。今來瘞埋之義。更不於壇上燔燎祝版。以別天神地示之異。上副陛下修誠致孝。肅恭祠享之意。奏聞候勅旨。狀前批送太常禮院。本所謹案古者祀天神。燔柴登煙。祭皇地示埋瘞。蓋燔柴則升煙於上。瘞埋則達氣於下。求神必以其類故也。王涇唐郊祀錄。凡祭祀地示。則爲瘞。培於神壇之壬地方。深取足容物。祭訖置牲幣祝饌於其中而埋之。熙寧祀儀。



皇地示神州地示皆爲燎壇方一丈高一丈有二尺開上南出方六尺在壇南二十步丙地祭大社大稷又設燎柴於西神門外道北以地示而同之天神之祀殊悖於禮所有今來王某起請實合禮制伏請自今祭皇地示神州地示大社大稷其祝版與牲幣饌物並瘞於埴更不設燎所有皇地示神州地示燎壇並乞除去

進鄴侯遺事劄子

臣前日伏奉聖旨許進鄴侯遺事今繕錄已具然無別本參校恐不能無脫誤竊以宇文黑獺之中材遇傾側窮困之時而輔之以區區之蘇綽然其爲法尙有可取伏惟陛下天縱上智卓然之材全有百年無事萬里之中國欲翊業垂統追堯舜三代在明道制衆運之而已如李泌所稱豈足道哉願求多聞以考古今得失之數則此書亦或可備省覽謹隨劄子上進

卷四十三

劄子

辭男雋說書劄子

臣今日伏奉聖旨除男雋大子中允崇政殿說書臣雖已奏論非宜尙未蒙恩開允事有關於國體豈敢冒昧不言臣竊觀陛下卽位已來慎惜名器一介之任必欲因能講藝之臣尤爲遴選如雋學問荒淺加以未更事任試之筦庫尙懼不勝論經之地實非所據陛下必欲誤加獎擢實恐上累知人任使之明伏

乞聖慈察臣懇款。追還成命。以合衆論之公。取進止。

辭男雱授龍圖劄子三道

臣伏承聖恩。以修撰經義罷局。除臣男雱龍圖閣直學士。臣雖已懇辭。未蒙昭察。伏念臣男雱誤蒙陛下知獎。特以粗知承學。比奉聖旨。撰進經義。尙未了畢。遂自太子中允崇政殿說書擢授右正言。充天章閣待制兼侍講。當是時。所叨恩命。已駭衆人觀聽。在臣父子。已所難安。伏蒙宣諭。令臣更勿辭免。臣亦以謂聖恩錄進書微效。遂不敢辭。自爾以來。雱以疾病隨臣。不復與聞經義職事。今茲罷局。在雱更無尺寸可紀之勞。不知何名。更受褒賞。非特於臣父子私義所不敢安。竊恐朝廷賞罰之公。如此極爲有累。伏望聖慈察臣懇悃。追寢誤恩。非特臣父子曲蒙保全。亦免衆人於聖政有所譏議。

二

臣伏奉詔書。以臣乞免臣男雱恩命。未賜允俞。臣之懇誠。已備前陳。螻蟻微誠。未能昭徹。然國家之賞典。務在報功。施之非宜。實累國體。非特在臣父子私義所不敢安。伏惟大明無所不燭。察臣非敢妄干聖聽。早賜追寢誤恩。謹再具劄子陳免以聞。

三

臣近累具劄子。辭免臣男雱恩命。伏蒙聖慈特降詔書。不允者。臣之懇款。已具前奏。聖恩深厚。未卽矜從。在臣區區。實不寧處。如臣叨昧。尙所難勝。況又賤息何名。享此賞而無勸。累國實多。伏望聖慈察臣父子。皆荷陛下全度之至恩。所以上報。生當隕首。死當結草而已。謹三具劄子陳免以聞。

進字說劄子

臣在先帝時得許慎說文古字。妄嘗覃思究釋其意。冀因自竭。得見崖略。若矇視天。終以罔然。念非所能。因畫而止。頃蒙聖問俯及。退復黽勉討論。賴恩寬養。外假歲月。而桑榆憊耗。久不見功。甘師顏至。奉被訓勅。許錄臣愚妄。謂然者。繕寫投進。伏惟大明旁燭。無疆豈臣熒爝。所敢銜冒。承命遑迫。置慚無所。如蒙垂收。得御宴間。千百有一。儻符神愜。愚所逮及。繼今復上。干汙宸扆。臣無任。

乞改三經義誤字劄子二道 元豐三年八月二十八日奉聖旨宜令國子監依所奏照會改正。

臣頃奉勅提舉修撰經義。而臣聞識不該。思索不精。校視不審。無以稱陛下發揮道術。啓訓天下。後世之意。上孤眷屬。沒有餘責。幸蒙大恩。休息田里。坐竊榮祿。免於事累。因得以疾病之間。考正誤失。謹錄如左。伏望清燕之間。垂賜省觀。儻合聖心。謂當刊革。卽乞付外施行。臣干冒天威。無任云云。取進止。

尙書義

皋陶謨。按見其惡。當作按其見惡。

益稷。故懋使之化。當作則懋使之化。

微子。純而不雜。故謂之犧。犧當作牲。完而無傷。故謂之尜。尜當作犧。

洪範。有器也。然後有法。此書所以謂之範者。以五行爲宗。故也。五行猶未離於形。而器出焉者也。擴而大。謂之弘。積而大。謂之丕。合而大。謂之洪。此書合五行以成天下之大法。故謂之洪範也。已上七十一字。今欲刪去。

又云陶復陶穴尙矣。後世易之棟字。而其官魯曰司空。因其故。不忘始也。已上二十六字。今亦欲刪去。  
周官唐虞稽古字上漏曰字。

周禮義

小宰其財用上其字當作共。

大府受藏之府則若職內掌邦之賦入是也。受用之府則若職歲掌邦之賦出是也。已上三十字。今欲刪去。

黨正歲屬其民者四。四當作五。

誦訓以詔王觀事當去王字。

典瑞手足腹背手當作首。

冢人山林之尸則以山虞。已上八字。今欲刪去。

御僕掌萬民之復。復當作逆。

大馭有軌也。軌當作軌。

大行人三公八命出封加一命。則謂之上公。已上十四字。今欲刪去。

詩義

北風北以言其威。雨雪以言其虐。涼者氣也。嗜者聲也。霏蓋言聚。霏蓋言散。氣之所被者近。聲之所加者遠。聚則一方而已。散則無所不加。此言其爲威虐後甚於前也。已上六十三字。今欲刪去。改云北風之

寒也而以爲涼。北風之厲也而以爲峭。此以言其爲威。雨雪之散也而以爲霏。雨雪之集也而以爲霏。此以言其爲虐。

君子偕老。玼兮玼兮。其之翟也者。服之盛也。服之盛字下。今欲添質宜之三字。又云。璫兮璫兮。其之展也。蒙彼縞絲。是泄衿也者。亦服之盛也。亦服之盛字上。欲減亦字。服之盛字下。欲添文宜之三字。

定之方中。說於桑田者。者當作則。

干旄。州里之士所建。今欲改爲鄉黨之官所建。

有女同車。公子五爭。爭當作爭。

駟鐵。駟馬旣閑。駟當作四。

墓門。食椹而甘。椹當作甚。

七月。去其女桑而猗之。然後柔桑可得而求也。已上十六字。今欲刪去。改云。承其女桑而猗之。然後遠揚可得而伐也。

又蠶月者。非一月。故不指言某月也。下添云。蠶女事也。故稱月焉。

又云。猗薪之也。言猗女桑則遠揚可知矣。言伐遠揚則女桑可知矣。皆伐而猗之也。已上三十字。今欲刪去。

車攻。言其連絡布散衆多。若奕棋然。已上十二字。今欲刪去。

小旻。發言盈庭。廷當作庭。



桑扈受福不那。那當作那。  
生民麻麥懷懷。麥當作麥。

公劉篤之字。从竹从馬。馬行地無疆。以竹策之。則力行而有所至。篤之爲言力行而有所至也。已上三十字。今欲刪去。

卷阿藹藹然盛多。然當作其。又云。故次以旣醉太平也。多太平二字。今合刪去。

召旻昏非所以爲哲。字上漏明字。今合添。

時邁政之所加。孰敢不動懼。今欲改去。政之所加。孰敢不震動疊息。

那馨管將將。管當作筦。

## 二

臣近具劄子。奏乞改正經義。尙有七月詩。剝棗者。剝其皮而進之。養老故也。十三字。謂亦合刪去。如合聖心。亦乞付外施行。取進止。

### 論改詩義劄子

臣子雋奉聖旨。撰進經義。臣以當備聖覽。故一二經。臣手乃敢奏御。及設官置局。有所改定。臣以文辭義理。當與人共。故不敢專守己見。爲是旣承詔。頒行學者。頗謂所改未安。竊惟陛下。欲以經術。造成人材。而職業其事。在臣所見。小有未盡。義難自默。所有經置局。改定諸篇。謹依聖旨。具錄新舊本。進呈內。雖舊本。今亦小有刪改處。并略具所以刪復之意。如合聖旨。卽乞封降檢討。呂升卿所解詩義。依舊本。頒行。小有

刪改卽依聖旨指揮取進止。

答手詔言改經義事劄子九月十一日

臣伏奉手詔。依違之罪。臣愚所不敢逃。然陛下旣推恩惠卿等而除其所解。臣愚不敢安此。若以其釋說有甚乖誤者。責臣更加刪定。臣敢不祇承聖訓。取進止。

改撰詩義序劄子

臣伏奉手詔。以臣所進三經義序。有過情之言。宜速刪去。臣雖嘗敷奏。以爲文字所宜。又奉聖訓再三。但今序述解經之意。不須過有稱道。伏惟皇帝陛下盛德至善。孚於四海。非臣筆墨所能加損。然因事宜著。人臣之職也。誠以言之不足爲懼。不以近於媚諛爲嫌。而上聖所懷深仁。謙損。臣敢不奉承詔旨。庶以仰稱堯禹不爭不伐之心。所解撰到詩義。并前進書周禮義序。謹隨劄子投進。昧冒天明。臣無任。

乞以所居園屋爲僧寺并乞賜額劄子

臣幸遭興運。超拔等夷。知獎眷憐。逮兼父子。戴天負地。感涕難勝。顧迫衰殘。糜捐何補。不勝螻蟻微願。以臣今所居江寧府上元縣園屋爲僧寺一所。永遠祝延聖壽。如蒙矜許。特賜名額。庶昭希曠。榮與一時。仰憑威神。誓報無已。

乞將田割入蔣山常住劄子

臣父子遭值聖恩。所謂千載一時。臣榮祿旣不及於養親。雋又不幸嗣息未立。奄先朝露。臣相次用所得祿賜及蒙恩賜雋銀置到江寧府上元縣荒熟田。元契共納苗三百四十二石七斗七升八合。籩一萬七

千七百七十二領。小麥三十三石五斗二升。柴三百二十束。鈔二十四貫一百六十二文。省見託蔣山太平興國寺收歲課。爲臣父母及雩營辦功德。欲望聖慈。特許施充本寺常住。令永遠追薦。冒昧天威。無任祈恩屏營之至。取進止。

謝宣醫劄子

食浮擬災。自取危疾。敢籲天聽。上煩愍惻。不圖聞徹。特冒慈憐。亟遣內臣挾醫馳降。臣背瘡餘毒。卽得仇。薰敷貼平完。尙以風氣冒悶。言語蹇澁。又賴杜壬診療。尋皆痊愈。臣迫於衰暮。自分捐沒聖時。朽齏更生。實叨殊賜。戴天荷地。感涕難言。臣瞻望闕庭。不任屏營汎瀾激切之至。

卷四十四

劄子

乞解機務劄子六道

臣以羈旅之孤。蒙恩收錄。待臯東府。於今四年。方陛下有所變更之初。內外小夫紛然。臣實任其臯戾。非賴至明辨察。臣宜誅斥久矣。在臣所當圖報。豈敢復有二心。徒以今年以來。疾病浸加。不任勞劇。比嘗粗陳懇款。未蒙陛下矜從。故復黽勉至今。而所苦日甚一日。方陛下勵精衆治。事事皆欲盡理之時。乃以昏疲久尸宰事。雖聖恩善貸。而臯釁日滋。至於不可復容。則終上累陛下知人之明。非特害臣私義而已。臣所以昧冒有今日之乞也。伏奉宣諭。未賜哀矜。彷徨屏營。不知所措。然臣所乞。固已深慮熟計。而後敢言。

與其廢職而至誅。則寧違命而獲譴。且大臣出入。以均勞逸。乃是祖宗成憲。蓋國論所屬。怨惡所歸。自昔以擅其事。鮮有不遭臯黜。然則祖宗所以處大臣。不爲無意也。臣備位亦已久矣。幸蒙全度。偶免譴呵。實望陛下深念祖宗。所以處大臣之宜。使臣獲粗安便。異時復賜驅策。臣愚不敢辭。

二

臣某螻蟻微誠。屢煩天聽。每蒙訓答。未賜矜從。惶怖征營。不知所措。臣今日奏對。近於日旰。不敢久留。以勤聖體。所以依違遂退。卽非敢食其言。以道事君。誠爲臣之素守。苟可強勉。而免違忤之辜。臣亦何敢必其初心。實以疾病浸加。恐隳陛下所付職事。上累陛下知人之哲。下違臣不能則止之義。此所以彷徨迫切。而不能自止也。且臣所乞。特冀暫均勞逸。非敢遂卽田里之安。竊謂聖恩不難賜許。謹具劄子陳乞。伏望聖慈。特垂開允。

三

臣今日得望陛下清光。伏蒙敦喻獎激。可謂備厚矣。臣雖愚戇。豈敢忘陛下至恩盛德。然臣之懇款。亦已具陳。實望陛下照察哀憐。使臣得休養其疲昏。以免曠職之負。而不累陛下知人之明也。臣干忤天威。無任惶怖之至。

四

臣今日伏蒙陛下令呂惠卿宣道聖旨。又令馮宗道隨賜手詔。趣令復位。眷顧之厚。非臣殺身所能上報。然臣不才。無補時事。肝鬲狼狽。已具面陳。君臣之義。實均父子。苟尙可以黽勉。豈敢輕爲去就。誠以義不

獲已。須至冒昧天威。陛下至仁。常恐一物失所。況臣特蒙獎擢。久備驅策。夙夜之勞。簡在聖心。豈容不思。所以全安之。而令終於顛躓也。伏望哀憐匹夫之志。有不可奪。早賜處分。臣無任瞻天祈恩。激切之至。取進止。

五

臣伏蒙聖恩。特降中使傳宣。封還所上表。不允所乞。臣誠惶誠感。不知所措。竊念臣蒙陛下恩德。至深至厚。方陛下盱食焦思之時。豈宜自求安佚。實以疾疢所嬰。曠廢職事。若不早避賢路。必且仰誤任使。懇懇所懇。具如前奏。伏惟陛下天地父母。曲賜矜憐。察臣干祈。出於甚不得已。臣生當隕首。死當結草。謹再具劄子陳乞。臣無任惶怖。懇迫。祈恩之至。

六

臣伏奉聖恩。特降中使令臣入見供職。臣之懇誠。略已昧冒。天聽高邈。未蒙垂惻。輒復陳紱。仰冀哀憐。伏念臣孤遠疵賤。衆之所棄。陛下收召拔擢。排天下異議。而付之以事。八年於此矣。方陛下興事造功之初。羣臣未喻聖志。臣當是時。志存將順。而不知高明彊禦之爲可畏也。然聖慮遠大。非愚所及。任事以來。乖失多矣。區區夙夜之勞。曾未足以酬萬一之至恩。今乃以久擅寵利。羣疑並興。衆怨總至。辜惡之釁。將無以免。而天又被之疾疢。使其意氣昏惰。而體力衰疲。雖欲彊勉。以從事須臾。勢所不能。然後敢干天威。乞解機務。竊以謂陛下天地父母。宜垂矜憐。論其無功。則雖可誅。閱其有志。則或宜宥。終始全度。使無後艱。而未蒙天慈。顧哀猶欲彊以重任。使臣黽勉。尙能有補聖時。則雖滅身毀宗。無所避憚。顧念終無來效。而



方以危辱上累朝廷。此臣所以不敢也。陛下明並日月。何所不燭。願賜容光之地。稍委照焉。則知臣之倦。非敢苟忤恩指也。臣乞且於東府聽候朝旨。伏望陛下垂恩早賜裁處。臣不任昧死干祈激切之至。

謝手詔慰撫劄子

臣昨日伏奉手詔。所以慰撫備厚。非臣疵賤之所宜蒙。伏讀不任感激屏營之至。今日呂惠卿至。臣第具宣聖旨。臣雖糜軀隕首。豈能上酬獎遇。臣自江南召還。獲侍清光。竊觀天錫陛下聰明睿智。誠不難興堯舜之治。故不量才力之分。時事之宜。敢以不肖之身。任天下怨誹。欲以奉承聖志。自與聞政事以來。遂及期年。未能有所施爲。而內外交構。合爲沮議。專欲誣民。以惑聖聽。流俗波蕩。一至於此。陛下又若不能無惑。恐臣區區終不足以勝。而久妨衆邪之路。則或誣罔出於不意。有甚於今日。以累陛下。知人任使之明。故因疾輒求自放。陛下不以臣狂獩。賜之臯戾。而屈至尊之意。反復誨諭。臣豈敢尚有固志。以煩督責。只候開假。卽入謝區區所懷。冀得面奏。臣無任感天荷聖激切屏營之至。謹具劄子奏知。

謝手詔訓諭劄子

臣以不才。久曠高位。冒昧求解。屢煩聖聽。曲蒙矜允。實荷至恩。繼奉手詔。俯垂訓諭。非臣隕首所能報稱。伏惟陛下躬堯舜盛德。舉千載一隆之政。以福休斯民。萬邦黎獻。所願致死。況臣疎遠疵賤。首蒙察舉。陛下任之至重。而眷之至優。一旦遠離。誠非獲已。苟異時陛下未賜棄絕。而臣犬馬之力。尙足以效。則豈宜背負恩德。長自絕於聖時哉。臣瞻天荷聖。無任激切之至。

答手詔封還乞罷政事表劄子

臣今日具表乞罷政事。方屏營俟命。而呂惠卿至。臣第傳聖旨趣臣視事。續又奉手詔。還臣所奏。喻以天下之事。盡力固可成就。以卿所學。不宜中輟。俛聽伏讀。不勝螻蟻區區感慨惻怛之至。臣蒙拔擢。備數大臣。陛下所以視遇。不爲不厚矣。豈敢輕爲去就。誠以陛下初訪臣以事。臣卽以變風俗立法度爲先。今待臯期年。而法度未能一有所立。風俗未能一有所變。朝廷內外。詖行邪說。乃更多於鄉時。此臣不能啟迪聖心。以信所言之明効也。雖無疾疢。尙當自劾。以避賢路。況又昏眩。難以看讀文字。卽於職事。當有廢失。雖貪陛下仁聖卓然之資。冀憑日月末光。粗有所成。而自計如此。豈容偷假名位。坐棄時日。以負所學。上孤陛下責任之意。伏望陛下哀憐矜察。許臣所乞。毋令臣得要君之嫌。重爲流俗小人所毀。臣不勝祈天俟聖激切之至。取進止。

答手詔令就職劄子

臣累奏乞解機務歸田里。伏奉手詔令臣無復有請。祇服聖訓便宜就職。然臣所以致身許國。正欲行事君之義而已。若致身於辱殆之地。以累陛下知人之明。而令天下後世譏議及國。則非臣所學事君之義也。昔仲山父旣明且哲。以保其身。故宣王有任賢使能中興之功。臣旣不自知。又昧於知人。信己妄行。以至今日。免於大戮。實陛下天地父母之賜也。若猶冒恩不卽自弛。終恐傷陛下保全臣子之仁。是以不敢伏望陛下哀臣懇至。特賜矜許。臣無任瞻天祈恩激切之至。取進止。

答手詔留居京師劄子

臣伏奉手詔。欲留臣京師。以爲論道官。宜體朕意。速具承命奏來。臣才能淺薄。誤蒙陛下拔擢。歷職旣久。

無以報稱。加以精力衰耗。而咎釁日積。是以冒昧乞解重任。幸蒙聖恩。已賜矜允。而繼蒙恩遣呂惠卿傳聖旨。欲臣且留京師。以備顧問。臣竊伏惟念父子荷知遇。誠不忍離左右。既又熟計論道之官。固非所宜。且以置之閑地。似爲可處。陛下付託既已得人。推誠委任。足以助成聖治。臣義難以更留京師。以速官謗。若陛下付臣便郡。臣不敢不勉。至於異時。或賜驅策。卽臣已嘗面奏。所不敢辭。伏望聖心。特賜矜察。臣無任感天荷聖。激切征營之至。伏取進止。

辭僕射劄子三道

臣伏奉制恩。以提舉修撰經義了畢。特授臣尙書左僕射兼門下侍郎。加食邑實封。承命惶怖。已曾面辭。宣諭稠疊。未垂聽允。伏念臣特蒙陛下知遇。任使實以稍知經術。叨塵非一。每愧無功。更以訓釋微勞。過受褒遷殊禮。格之公論。孰以爲宜。況在私誠。尤難安此。伏望陛下俯昭悃悞。特賜哀憐。追還誤恩。以保危拙。謹具劄子陳免以聞。

二

臣近具劄子辭免恩命。伏蒙聖慈。特降詔書不允者。區區所陳。備出肝膈。重煩睿訓。以懼以慚。伏念臣蒙恩自外召還。復得與聞政事。智衰耄及。筋力弗支。仰惟駿德之日躋。深懼薄材之難副。雖未敢以妨賢自弛。願豈宜以非分妄遷。賞浮於勞。實累國體。豈惟私義。所不敢安。伏望聖慈。深以保全。臣子爲念。早賜追還成命。以允中外論議之公。謹再具劄子陳免以聞。

三

臣近累具劄子辭免恩命。伏蒙聖慈特降詔書不允者。睿訓丁寧。豈宜逋慢。顧惟懇款。實有可矜。干忤天威。良非獲已。伏念臣出於孤遠。遭值聖時。弱力而重任。薄功而厚享。夙興夜寐。深懼顛隲。豈敢非分。更叨殊獎。且方陛下發明經術。啓迪人材。而臣偶以乏人。遂當器使。遺經殘缺。旣不易知。聖學高明。又難仰副。雖已強顏應詔。實恐難以頒行。豈意天度包荒。藏疾。褒崇獎勵。在所難勝。隆儒尙學。誠陛下盛德。量能知分。亦臣之私義。伏望聖慈俯照誠悃。以其終難昧冒。早賜追寢。誤恩謹三具劄子。陳免以聞。

### 乞宮觀劄子五道

臣某頃被召還。復汙宰司。行以亢滿易墮。事以衰疾多廢。幸蒙恩釋重寄。尙兼將相之官。自惟憂傷病疚之餘。復當辭劇就閒之日。過叨榮祿。非分所宜。黽勉方州。亦將不逮。故因賜對。輒預奏陳。俟到江寧。須至上煩聖慮。乞以本官外除一宮觀差遣。於江寧養疾。過蒙眷獎。喻以毋然。非臣糜殞所能仰稱。而臣自離闕庭。所苦日侵。目眩頭昏。背寒膈壅。加之喘逆。稍勞輒劇。若非蒙恩許免藩任。且令休養。卽恐瘳復無期。輒敢昧冒天威。具陳前日悃悃。伏望陛下特垂睿聽。俯亮愚誠。早賜矜從。使得寧濟。卽異時稍堪驅策。誓復罄竭疲驚。臣無任。

### 二

臣某近輸悃悃。仰丐恩憐。干忤天威。方懷憂畏。伏蒙聖慈特遣使人賞賜訓勅。諭以至意。撫存顧念。逮及存沒。負荷恩德。無以勝任。瞻望闕庭。唯知感涕。然臣之懇懇。實有可言。伏念臣抱疾以來。衰疲浸劇。若眚勉從事。必不能上副憂勤。而應接之勞。適足以自妨休養。又地閑祿厚。非分所宜。聖心雖示優容。臣終難

於叨昧。伏望陛下俯垂燭察。早賜矜從。他日苟獲夷瘳。餘年敢辭驅策。臣無任。

三

臣某比因馮宗道還闕。已具輸區區螻蟻之情。繼蒙撫存。曲賜訓諭。臣誠惶誠感。已具表稱謝。以聞。竊惟天慈終始眷憐。故欲賦以厚祿。示以優禮。不然一州之守。豈憂付屬乏人。臣憂患餘生。加之疾病。喘焉朝夕。難冀久存。陛下所以愛臣。何啻天地父母。令臣多尸廩賜。重貽亢滿之殃。豈若賜以安閑。使有寧瘳之福。伏望深垂簡照。早賜矜從。他日旅力復可驅馳。敢不致死。以圖報效。臣無任。

四

臣某備位七年。初無分毫績効。以病自列。獲解繁機。而誤恩曲加。寵祿并過。豈臣庸朽所可堪任。況自涉春以來。衆病并作。氣滿力憊。殆不可支。其勢如此。以尸厚祿。則有食浮之憂。以任州事。則有官曠之責。計臣之分。無一可爲。故願乞其不肖之身。休養歲月。而璽書繼至。訓勅加嚴。雖陛下示眷獎之意。始終不渝。而臣竊自度量。終難踴勉。以稱萬一。徬徨踟躕。不知所言。輒復干冒天威。期於得請而後已。伏望陛下深垂簡照。早賜矜從。他日若獲寧瘳。顧雖晚節末路。尙知補報。惟所驅策。豈敢辭免除。已具表。謹具劄子陳乞。臣無任。

五

臣某近四上表。乞以本官外除。一宮觀差遣。伏蒙聖慈特降詔書。不允所乞。仍斷來章。螻蟻之微。頻煩寵諭。臣之懇誠。已具累表。愚衷激切。終冀矜從。伏念臣荷國厚恩。未報萬一。若非疾苦不能任事。豈敢數違。

訓勅。以自取逋慢之誅。但以病勢日增。雖外視形色若無甚苦。而神耗于中。力憊于外。一有動作。卽不可支。思慮恍然。事多遺忘。以此居官。豈能塞責。且一方之任。非獨簿書獄訟在所省察。至於儆戒盜賊。輯安兵民。責在守臣。事實至重。此豈精神衰耗。體力疲憊之人所可堪任。伏望陛下加惠留聽。察其所請。出於誠然。早賜開允。則非獨於臣私分得以自安。亦於陛下任使之際。無曠官廢事之悔。臣愚不勝至願。謹復具劄子陳乞。臣無任。

### 求退劄子

臣伏奉手詔。令臣二十三日入見。臣明日當入見。然臣之懇款。具如前奏所陳。匹夫之志。有不可奪。實望聖慈。必賜矜從。

### 已除觀使乞免使相劄子四道

臣某衰疾疲曳。難於自力。于愬天聽。至于三四。逋慢訓獎。臯當誅殛。伏奉勅命。就除觀使。俯從燕安之願。欲猶假非分之名器。鴻慈覆載。不啻天地。感激涕泗。無言以諭。然以將相之祿。養疾於田里。歷選近世勳賢。未有若斯比例。臣愚無狀。績効不昭。欲以何名。敢此叨昧。且臣蒙陛下識拔。序之羣臣之右。當以粗知分義。爲異庸人。今若以衰殘向盡之年。貪非所據。豈不自隳素守。而仰累陛下知人之明。伏望聖慈。察臣累奏。許以本官充使。於江寧府居住。冀蒙瘳復。終誓糜捐。所有勅命。臣未敢祇受。除已具表。謹復具陳。乞以聞。干忤天威。臣無任。

### 二

臣某伏奉詔書。不允所乞。祇荷聖訓。丁寧備至。非臣庸朽所可堪稱。伏自惟念臣以疾病。不勝從事之勞。而欲自休養。退歸田里。乃分之宜。尚恃眷憐。私竊自恕。而求以本官食宮觀之祿于外。於臣之義。媿負已多。而陛下乃欲使之兼將相之重。而處於此。雖仰戴恩德。爲至厚矣。而臣歷選前代。近至本朝。所以寵待勳舊之臣。無有斯比。況臣久尸重任。績効不昭。豈可度越前人。有此叨據。是且上虧陛下名器。不以假人之道。下傷愚臣知止之義。伏望特垂睿聽。早賜允從。則非獨於臣私分得以自安。亦於天下公論爲協。除已具表。謹復具劄子陳乞以聞。臣無任

三

臣某近以懇誠上干天聽。伏蒙聖慈。特降中使。賚賜詔書。仍斷來章。臣以朴愚。久遭明命。臯譴之及。所不敢辭。而陛下加惠寬矜。慰喻備至。仰荷天地厚恩。非臣殞越所能報稱。然臣之懇懇。亦累具聞。分義既所難受。臣亦何敢自己。竊惟人君之御臣。以其任隆。而責重。故委之高爵重祿。而無媿。此上下所以兩得而能治安也。今臣旣以疲瘵。退歸閭里。尚恃陛下眷存。謂其嘗預政事。有夙夜之微勤。故敢求以本官食宮觀之祿于外。已於理分爲所非宜。而陛下乃疏誤恩。使兼將相之重。臣愚不肖。病不任事。顧於陛下勵精求治之時。不能自力以裨補萬一。而坐尸名器。如此其厚。人臣之出力赴功。方任隆責重。而有勳勞者。陛下將復何以處之。此臣所以不敢也。臣若苟貪仰副訓勅。而不知慮此。則非獨於臣私義無以自全。亦於國家大體所損非細。故復冒昧期於得請而後已。伏望陛下始終念察。早賜聽許。則非獨臣爲幸。臣無任

四

臣某近再以懇誠上干睿聽。逋慢明訓。方虞譴謫。伏蒙天慈。特差臣弟某賚賜詔書。不允所乞。傳諭德意。撫存備厚。仰荷天地至恩。捐軀隕首。無以上報。伏自惟念。臣以衰病無勞之身。得請于外。雖能爲上陳力。任一方之寄。以忝將相。尙爲非分。況今蒙恩寬假。得就燕閒。豈可坐而尸此。以養痾田里之中。此臣所以不敢忘止足之義。而自取辱殆也。所懷懇激。已具累奏。雖陛下申加獎勵。恩德有隆。而愚臣竊自揣稱。終無可以叨昧之理。伏望陛下俯垂閔察。早賜開允。則非獨臣爲幸甚。除已具表。謹復具劄子陳乞。以聞。臣無任。

宣諭蘇子元劄子

臣適已見蘇子元具宣聖旨。然兵事貴速。憂在失時。恐子元往不如期。郵行之疾。亦恐子元道路偶或有故稽留。則無及事。臣愚謂宜遞中賜郭逵等劄子。更錄付子元。令申喻曲折。

卷四十五

內制册文 表本 青詞

郊祀昊天上帝册文

伏以眷命作邦。百年於此。蒙休承福。外內用寧。施及冲人。嗣膺歷服。燎禋有典。稱秩惟時。

郊祀皇地祇册文

伏以大報于郊。有典咸秩。厥作成物。配天同功。合食泰壇。義存一體。猥以冲眇。紹休前人。絜承昭事。不敢



不察。

郊祀配帝太祖皇帝册文

伏以命于帝廷。肇造區夏。掃除僭悖。人以永寧。陟配天郊。實存舊典。靈承圭薦。其敢忘初。

朝享景靈宮聖祖大帝册文

伏以靈德在天。實基皇命。降依下土。臨況後人。方以眇躬。進承郊廟。神遊所御。獻享惟時。庶幾顧歆。永有蒙賴。

朝享仁宗皇帝册文

伏以體道邁德。寵綏臣民。休嘉垂延。燕及于後。肆以寡昧。獲承郊宮。裸饋有儀。敢忘用舊。

朝享英宗皇帝册文

伏以靈德美行。實兆初潛。神民所歆。寶命自至。祇紹考服。循而弗改。用謚土宇。以詒沖人。登祔新宮。歷茲嘉月。燎禋有舊。裸享惟時。

皇后册文

維熙寧二年歲次己酉四月丁酉朔二十六日壬戌。皇帝若曰。自昔有天下。必擇建厥配。以承宗廟。以御家邦。肆朕受命。奉循前烈。考慎典册。以祈協于神民。咨爾向氏。懿柔淑恭。舊有顯聞。肇功惟祖。弼亮帝室。流德之澤。覃延後嗣。是產碩媛。比賢姜任。越朕初載。來嬪藩邸。盟饋在中。率禮無違。以至嗣服。祇承內事。齋明夙夜。罔有曠矢。宜崇位號。表正宮庭。今遣攝太尉推忠協謀同德佐理功臣樞密使光祿大夫檢校

太傅行尙書刑部侍郎上柱國東平郡開國公食邑五千戶食實封一千戶呂公弼攝司徒朝散大夫右諫議大夫參知政事護軍太原郡開國侯食邑一千一百戶賜紫金魚袋王珪持節冊命爾爲皇后夫惟興王釐厥士女咸自內始達于四海朕克勤人用弗怠朕克儉人用弗奢朕克正人用無敢側頗爾勵朕相乃濟登茲於戲匪初惟艱惟慎厥終爾忱念茲朕以永享天祿爾亦豫有無疆之福豈不臧哉

先天節皇帝謝內中露香表

伏以眇躬無似實膺駿命之休釐事有初敢廢靈承之舊冀蒙僊聖俯監齋精

天貺節皇帝謝內中露香表

伏以靈命告休嘉名紀節用露熏之故事酬乾施之至恩仰賴監觀俯垂歆祐

降聖節皇帝謝內中露香表

伏以昊天錫命實佑永圖良月御時載臨嘉節率循故事升薦至誠仰冀靈明溥垂庇貺

冬至節皇帝謝內中露香表

伏以四氣隨旋一陽來復仰瞻穹昊祇薦芬香所冀含生並蒙垂福

南郊青城皇帝問太皇太后皇太后聖體表

臣名言自宮徂郊夙夜祇事方此寒沍闕於定省伏惟比日寢食宜加

太皇太后回答皇帝問聖體書

太皇太后致書于皇帝奉祠郊宮爲國大事夙興夜寐固已勤勞勉慎節宣以膺禧福

皇太后回答太廟皇帝問聖體書

太后致書于皇帝躬率羣臣肇見祖考孝思之至何以自勝尙慎興居以保休福

寒食節起居永定陵宣祖諸陵等處表

伏以榆火戒時柏城在望薦豆籩之新物弗獲躬親象几席之平居實存館御蠲烝有舊綉慕無窮

寒食節起居諸陵昭憲等諸后表

伏以桐華伊始火令載嚴獲嗣慶圖仰蒙慈芘追淑靈而莫逮歷時序以增思

中元節三陵起居諸后表

伏以素秋伊始華月旣盈物御氣以夷傷心感時而悽愴伏惟尊諡皇后惠風無斁慈範有詒猥以眇沖仰承慶裕瞻幽靈之所宅結永慕之至懷

八月一日永昭陵旦表

伏以暑往御時宵中應律載班秋朔申薦廟嘗伏惟尊諡皇帝體道成乾施仁應物率土方涵於聖化賓天遽愴於神遊追龍駕於空衢莫知所稅瞻烏耘之新隴但有至懷

十月一日永昭陵奏告仁宗皇帝旦表

伏以月乘該閱時御閉藏歲回薄以將更物盛多而可享恭惟尊諡皇帝德符穹昊功濟黎元方求大隗之居遂兆成周之葬光靈在望感惻交懷

十月一日起居永安陵等處諸陵表

伏以日星隨旋。歲月從邁。物更收攜之候。人積悽愴之懷。恭惟尊謚皇帝躬睿廣之材。撫休明之運。協九皇而高世。追三后之在天。方以眇躬。嗣膺神器。想威靈之如在。感氣序以增歎。

十月一日起居永安陵等處諸后陵表

伏以哀恫在疚。未盡通喪。弦晦如流。載更良月。恭惟尊謚皇后降釐媯汭。播美河洲。著慈範以如存。流徽音而可想。邈陵永望。感節深追。

冬至節上諸陵表

伏以氣復黃宮。晷移比陸。物驗土灰之應。官修雲物之占。恭惟尊號皇帝容廣應期。休明作乂。收功既往。垂範方來。感時序之變流。想威靈而慘結。

冬至節上諸皇后陵表

伏以四時交御。一氣潛萌。慶雖屬於履長。悲豈忘於追慕。恭惟尊謚皇后升儷尊極。協成休明。德範有詒。方美王雎之摯。容衣不闕。尚瞻榆翟之華。永想光靈。詎勝摧感。

寒食節上南京鴻慶宮等處太祖諸帝表

伏以火禁肇修。春祺溥被。維是奉粢之禮。適當濡露之時。恭惟尊謚皇帝德協上穹。功施後裔。俵神鄉而弗返。庶聖像以如存。紉慕威靈。載懷感忱。

中元節起居外州諸宮觀諸帝神御殿表

伏以夷則御辰。商聲甫協。望舒戒節。陰魄既盈。伏惟尊號皇帝道邁往初。恩涵品彙。於屬車之所御。有原

廟之舊儀。方此戒寒。豈勝追遠。

中元節起居諸陵表

伏以方秋厥初。既月之望。昊天始肅。繁露未晞。伏惟尊謚皇帝。若昔大猷。受天明命。躬有靈德。燕及後昆。猥以眇躬。紹膺慶緒。垂恩罔極。寧忘駿命之休。釐事有初。敢廢靈承之舊。冀蒙僊聖。俯鑒齋精。

十月一日起居揚州諸帝神御殿表

伏以徂歲如流。甫更良月。遺衣所御。實有經祠。方屬投艱。仰承錫羨。瞻威靈而如在。歷時序以增思。

冬至節上南京鴻慶宮等諸帝表

伏以子位杓回。黃宮氣應。既兆天正之始。方扶陽律之微。恭惟尊號皇帝。體道邁仁。膺時建極。豫游所次。館御如存。撫時序之變更。仰威神而感惻。

先天節奏告仁宗皇帝表

伏以金氣御時。商聲應律。仰閱火流之速。俯沾露降之凄。伏惟仁宗皇帝。功協聖謀。道侔乾則。垂至仁而不冒。慶實無窮。感素節以深追。悲何有極。

南郊下元節更不於景靈宮朝拜奏告聖祖大帝表

伏以帝繫所元。僊遊如在。載更令節。當款殊庭。以卜禋祠。將陳裸獻。惟祭儀之難贖。冀神監之具昭。

南郊禮畢皇帝謝內中功德表

伏以蠲烝廟祧。潔告郊時。實蒙芘貺。以獲顧歆。惟錫福之無窮。曷歸誠之有已。

南郊禮畢福寧殿奏謝英宗皇帝表

伏以膺命紹休。諏時協吉。告潔粢於廟室。奠嘉玉於郊丘。雖祇奉聖謨。獲無疆之慶賴。而深追神眷。重罔極之哀摧。

真宗皇帝忌辰奏告永定陵景靈宮慈德殿表

伏以慶靈回薄。永芘後昆。時序徂遷。奄更諱日。威神在望。感忱兼懷。

集禧觀開啓爲民祈福祈晴道場默表

伏以雨淫爲蓄。民用愁墊。式陳淨供。以致誠祈。冀格靈明。遂蒙開霽。惟潔粢之無害。仰休饗之有依。

南京鴻慶宮開啓皇帝本命道場青詞

伏以寶命有詒。以自求而致福。至神無體。隨所感而應誠。祇奉靈科。實存故事。冀蒙垂福。俯暨含生。

延祥觀開啓太皇太后本命道場青詞二道

伏以寶曆有詒。眇躬實嗣。獲承慈範。仰荷神休。方元命之在辰。按舊儀而庀事。庶蒙慶祐。永錫壽祺。

二

伏以聖功輔世。已大濟於艱虞。神道示人。用寵綏於祉福。敢因穀旦。祇奉靈科。冀大錫於壽祺。得永承於慈範。

崇先觀奉元殿開啓皇太后本命靈寶道場青詞

伏以克紹慶基。實蒙慈訓。邁茲元命。若昔宗祈。冀靈鑒之俯昭。垂壽祺之永錫。

靈釐內殿開啓太皇太后生辰道場青詞

伏以壇席盛陳。科儀肅設。眷言慈釐。祝此誕辰。永綏壽考之祺。上賴神靈之祐。

靈釐內殿開啓皇太后生辰道場青詞

伏以集黃冠之勝衆。仰紫極之真游。按用科儀。營祈祉福。仰求聰鑒。俯應誠心。

西太一宮開啓皇太后生辰道場青詞

伏以真聖在天。式序照臨之位。眇沖嗣歷。永惟顧復之恩。敢因誕毓之辰。祇薦熏修之事。仰祈眷祐。俯察傾輸。推純嘏以及親。與羣生而均貺。

龍圖閣開啓皇太后生辰道場青詞

伏以妙善可依。每俯從於誠悃。至恩難報。唯仰祝於壽祺。祇奉靈科。隆施淨供。上賴監歆之力。永綏顧復之慈。

廣聖宮開啓真宗皇帝忌辰道場青詞

伏以深追諱日。祇奉靈科。仰求神福之繁。率用邦儀之舊。永惟道曆。昭此誠祈。

福寧殿罷散三長月祝聖壽道場青詞

伏以順長羸之嘉月。按齋戒之靈科。庶用熏修。溥膺眷祐。精衷以薦。釐事既成。仰賴聖真。俯昭誠悃。

福寧殿開啓三長月道場青詞

伏以降年有永。實繇陰騭之功。嗣歷無疆。必謹靈承之志。帥時典故。若昔科儀。仰賴監觀。俯垂庇貺。

福寧殿罷散三長月道場青詞

伏以監觀在上。禳祝有儀。祇率舊章。仰祈況施。茂惟休福。俯逮烝黎。

福寧殿開啓三長月道場青詞

伏以皐月紀時。凱風應律。罄齋精而上禱。冀真聖之俯臨。永賴監觀。普垂庇祐。敢忘寅畏。仰答顧歆。

福寧殿罷散三長月道場青詞

伏以協用靈科。宗祈永命。惟神心之降格。獲釐事之告成。冀與羣元。並膺遐福。

福寧殿開啓南郊道場青詞

伏以欽柴宗祈。爲國大事。前期齋禱。舊典有稽。仰冀靈明。俯垂眷祐。

卷四十六

內制 青詞 密詞 視文 齋文

景靈宮三殿看經堂開啓中元節道場青詞

伏以三元令節。釐事有經。祇薦潔誠。宗祈祉福。仰繫庇貺。覃及庶黎。

景靈宮保寧閣下元節道場青詞

伏以殊廷外建。嘉節俯臨。夙設靈壇。蠲烝順祝。冀蒙真聖。垂祐羣黎。

醴泉觀寧聖殿開啓爲民祈福保夏道場青詞



伏以聖真丕冒。品庶具依。當蕃啓之盛時。用熏修之故事。仰祈聰直。俯鑒齋精。溥垂庇祐之仁。申錫壽康之福。

醴泉觀寧聖殿開啓年交道場青詞

伏以像圖夙設。壇席載嚴。當此歲陰之交。率時禳祝之舊。仰惟庇貺。俯逮黎元。

集禧觀洪福殿開啓謝雨道場青詞

伏以旱暵成災。懼物生之疵癘。祓齋以禱。荷神睭之顧綏。載闢靈場。式陳昭報。尙冀涵濡之施。以終庇祐之仁。

在京諸宮觀景靈宮等處祈雪青詞

伏以華歲幾終。同雲未兆。物將疵癘。咎在眇沖。敢罄齋精。上求嘉應。冀蒙貺施。孚佑含生。

謝晴青詞

伏以密雲作雨。暘不時若。蒙神賜祐。蓄沴用除。奔走祓齋。以謝靈貺。祀儀有秩。不敢怠忘。

坊州秋祭聖祖大帝青詞

伏以祠城在望。御館如存。敢因擎斂之辰。祇用吉蠲之薦。冀蒙垂祐。俯賜降歆。

滄瀛州地震設醮青詞二道

伏以地德安靜。震非其常。陰陽厥愆。以告咎罰。禮禳有典。仰賴監歆。所冀方隅。具膺庇貺。

伏以自河以北。坤載不寧。敷置淨筵。以祈後福。仰惟皇覺。敷祐羣生。監此齋精。俯垂庇貺。

北嶽廟爲定州地震開啓祭禱道場青詞

恭以地職持載。靜惟其常。今茲震搖。以警不德。涉河而北。又用驚騷。惟嶽有神。芑綏厥壤。祓除祠館。按用祈儀。請命上靈。冀蒙孚佑。敢忘夤畏。以答眷歆。

集禧觀開啓保夏祝聖壽金籙道場密詞

伏以時在炎烝。物方蕃祉。卽祠庭之精闕。竭清道之嚴祇。仰冀監觀。俯垂庇祐。具綏福履。申弭疾殃。覃及羣黎。永膺戩穀。

崇先觀開啓保夏祝聖壽金籙道場密詞

伏以眷祐無疆。熏修有舊。當朱明之紀候。祈蒼昊之垂仁。申錫休嘉。外覃品庶。敢怠靈承之志。永膺丕冒之恩。

延福宮開啓皇后生辰道場密詞

伏以統洽后宮。協承先廟。誕辰俯及。釐事有常。惟萬德之博臨。冀百祥之永錫。

延福宮開啓皇太后生辰道場密詞

伏以協承寶命。恩維拊育之深。俯應羣情。法有揔持之妙。齋場夙設。慶事備終。敢祈西竺之威神。永佑東朝之福履。

金明池開啓謝雨道場密詞

伏以蕃啓在時。蘊隆爲虐。罄齋精而上禱。蒙膏潤之旁流。祇報靈休。式陳淨供。尙祈終賜。無使後艱。

興國寺開先殿奏告太祖皇帝孝明皇后祝文

伏以像設有嚴。神游所御。瞻衣冠而如在。懼風雨之弗除。庀事將興。涓辰旣吉。永賴靈明之鑒。俯昭忱惕。之懷。

西京應天禪院奏告太祖太宗真宗皇帝御容祝文 告遷奉安還本殿之意

伏以殊庭有血。館御如存。吉日旣蠲。繕修惟謹。式陳嘉薦。以妥明靈。

啓聖院永隆殿奏告太宗皇帝元德皇后祝文

伏以威神所感。營繕有期。考禮舊章。宜時潔告。茂惟靈德。俯鑒至懷。

太廟八室奉慈諸廟奏告南郊等處祝文

伏以三歲一郊。實昭大報。前期潔告。國有故常。仰冀靈明。俯垂鑒祐。

諸皇后陵奏告謝南郊禮畢祝文

伏以禋饗郊宮。國之重事。唯蒙慈庇。以獲休成。筴祝有經。敢忘用舊。

景靈宮英德殿奉安英宗皇帝御容祝文

伏以先聖舊祠。祖宗所御。嗣興寶構。追奉靈游。諏日旣嘉。具儀以妥。徂惟在上。永保厥寧。

天章閣延昌殿權奉安英宗皇帝御容祝文

伏以相名山於洛宅。旣兆寢園。倣原廟於漢儀。將遷館御。潔除祕宇。嚴奉睟容。冀靈蹕之少安。副衷情之

罔極。

西京應天禪院圻修太祖神御殿祭告祝文

廟刹有嚴。威神所御。將改新於寶構。永欽奉於睟容。仰冀靈明。俯垂鑒佑。

景靈宮修蓋英宗皇帝神御殿上梁祭告太歲已下諸神祝文

伏以欽奉僊遊。肇營寶構。舉修梁而揆日。具蠲饋以寧神。祓此後艱。仰繫大祐。

慈孝寺崇真彰德殿爲經霖雨垂脊脫落奏告祝文

伏以雨淫告災。垣屋或壞。惟神所御。有圯弗支。諏用靈辰。改新厥構。蠲爲祗薦。於禮有常。

太廟后廟奉慈廟雅飾告祝文

伏以三歲一郊。祖宗成法。靈明所御。繪飾有時。方此儻工。禮當潔告。

西太一宮立秋祝文

伏以候火旣流。占灰甫應。真游所御。靈時具存。率循舊章。作薦常事。仰祈錫福。大芘含生。

中太一宮立冬祝文

伏以館御國郊。庇貺天物。祠宮筴祝。在禮有初。涓選吉時。作薦常事。敢祈孚祐。施及羣黎。

九宮貴神祝文

伏以卜用靈辰。躬修禋享。清壇所兆。潔告有常。

景靈宮里域真官祝文

伏以宗祈陽郊。祇見神祖。葆茲淨域。夙賴真靈。祇率舊章。式陳嘉薦。

天地社稷宮觀等處祈晴青詞祝文

積陰爲沴。淫雨弗止。蕩決漂墊。將爲民菑。懼德不類。以干咎罰。是用齋戒。宗祈明靈。冀蒙垂矜。遂獲開霽。休嘉之錫。實被含生。

五嶽四瀆諸廟祈晴祝文

淫雨弗止。將爲民菑。懼德不孚。以罹咎罰。是用奔走。禱於明神。惟神監觀。惠以時暘。非民獨蒙嘉福。神亦永有休享。

定州北嶽爲地震祭禱祝文

伏以自河以北。陽出鎮陰。人用不寧。咎由菲德。永惟聰直。庇祐一方。祇飭使人齋精以禱。尙蒙歆鑒。無有後艱。

文德殿告遷御容祝文

伏以綬冠卽事。喪紀有終。黼座歆神。哀懷靡極。度新宮而館御。諏吉日以徂遷。式冀靈明。永歆豐潔。

南郊青城綵內畢功大殿上開啓保安祝壽諷孔雀明王經齋文

伏以祀兆方嚴。齋場夙設。實延淨衆。開誦梵文。旣蒙大施之仁。助錫丕平之福。

南郊青城綵內畢功大殿上開啓保安祝壽諷法華經齋文

伏以帷宮旣具。皇邸將臨。發誦祕文。施其景福。仰惟覺慈之覆。俯綏禋享之成。

五臺開啓南郊禮畢道場齋文

伏以靈承在上。懼休命之難。大報於郊。惟盛儀之獲。祇循故事。恪報厥成。仰賴顧歆。終垂庇貺。

內中延福宮性智殿開啓太皇太后生辰道場齋文

伏以大陰協兆。良月御時。猥以眇躬。獲承慈範。敢因穀旦。祇集勝緣。實賴等慈。具綏景福。

十月一日永昭陵下宮開啓資薦仁宗皇帝道場齋文

伏以大明光藏。上智之所發揮。妙揔持門。羣靈之所歸賴。歲陰逝矣。陵闕超然。憑淨衆以有祈。冀真遊之無礙。

福寧殿開啓資薦英宗皇帝道場齋文

伏以憑几之言未遠。滌場之候更新。摧慕安窮。攀號靡及。旁招淨衆。歸誠甘露之門。仰祝靈游。取證法雲之地。

中元節福寧殿水陸道場資薦英宗皇帝道場齋文

伏以正等上緣。含生永賴。薦龍施之淨供。助宿植於神游。仰冀靈明。俯昭哀懇。

萬壽觀廣愛殿資薦章惠皇太后忌辰道場齋文

伏以諱日俯臨。祠庭外闕。遴東黃冠之衆。宗祈紫極之神。按用前科。追營後福。庶超升之莫禦。絜庇貺之有加。

天章閣延昌殿開啓權奉安英宗皇帝御容道場齋文

伏以翠旒所御。玉色如存。將改洩於清閒。少卽安於祕近。旁招淨衆。仰助勝緣。憑妙覺之摠持。冀皇靈之升濟。

溫成皇后陵獻殿內開啓冬節道場齋文

伏以光靈所宅。崇奉有儀。因令節以熏修。冀貝乘之祈助。仰希錫福。俯逮含生。

金明池上開啓祈雨粉壇道場齋文

伏以肅設祠壇。宗祈解澤。膏潤之祥甫兆。□炎之懼更深。實恃靈明。厚矜黎庶。遂令沾足。用格豐穰。

金明池上開啓謝雨道場齋文

伏以常暘告罰。將害黍盛。夙設靈場。載祈膏澤。神休旣格。昭報有儀。尙惟孚佑之仁。終保嘉生之享。

龍圖天章寶文閣接續開啓祈雪道場齋文

伏以歲序就窮。尙愆嘉雪。能仁應世。閱此含生。冀佑上靈。錫之休證。式陳淨供。以告齋誠。

泗州塔謝晴齋文

天蓄於民。淫雨不止。祓除齋戒。並走以祈。實蒙等慈。俯應誠悃。永惟庇貺。其敢弭忘。

後苑天王殿坼修了畢齋文

伏以擬辰居之奧密。飭祆像之嚴威。繕治告功。祓齋祈福。庶憑至善。永保多盤。

內制詔書

勅榜交趾

勅交州管內溪峒軍民官吏等。眷惟安南。世受王爵。撫納之厚。實自先朝。含容厥愆。以至今日。而乃攻犯城邑。殺傷吏民。干國之紀。刑茲無赦。致天之討。師則有名。已差吏部員外郎充天章閣待制趙高充安南道行營馬步軍都總管經略安撫招討使兼廣南安撫使昭宣使嘉州防禦使入內內侍省都押班李憲充副使。龍衛四廂都總管指揮使忠州刺史燕達充副都總管。順時興師。水陸兼進。天示助順。已兆布新之祥。人知悔亡。咸懷敵愾之氣。然王師所至。弗迓克奔。咨爾士庶。久淪塗炭。如能諭王內附。率衆自歸。爵祿賞賜。當倍常科。舊惡宿負。一皆原滌。乾德幼稚。政非己出。造廷之日。待遇如初。朕言不渝。衆聽無惑。比聞編戶極困。誅求已戒。使人具宣恩旨。暴徵橫賦。到卽蠲除。冀我一方。永爲樂土。

提轉考課勅詞

先王考績之次序。雖見於經。而其詳不傳於後世。朕若稽古以修衆功。而諸路刺舉之官。未有以考其賢否。比勅有司。詳議厥制。條奏來上。詢謀悉同。其使布宣。以勵能者。而擇左右可信之良。使典治之。古人有言。徒善不足。以爲政。徒法不能。以自行。今朕有念功樂善之志焉。而又繼之黜陟幽明之法。以待天下之大吏矣。然非夫任事之臣。躬率以正。而考慎其實。與士大夫宣力於外者。皆安於禮義。而不以便文徼幸爲姦。則朕之志。豈能獨信於天下。而法亦何恃以行哉。咨爾在位。其各悉力一心。務祇新書。以稱朕至誠惻怛之意。



韓琦加恩制

門下。朕祇率舊章。肇稱吉禮。對越天地。具獲靈明之歆。相維公卿。並膺休顯之賜。其孚大號。以寵元勳。推誠保德。崇仁守正。協恭贊治。亮節翊戴。功臣淮南節度揚州管內觀察處置營田等使。開府儀同三司。守司徒檢校太師兼侍中行揚州大都督府長史上柱國魏國公食邑一萬三千七百戶。食實封五千戶。韓琦躬受偉材。出陪熙運。保茲天子。進無浮實之名。正是國人。退有顧言之行。間朝廷之兩社。揉方域之萬邦。辰猷具臧。器寶加重。中辭機軸之要。外卽蕃屏之安。衡紱紘綆。備三公服飾之盛。囊兜戟纛。兼大將威儀之多。序績旣崇。修方彌謹。協成宗祈之禮。與有顯助之勞。肆衍本封。申加美稱。於戲。恩典徽數。所以旌帝臣。明德茂功。所以獎王室。往惟勵翼。服此褒嘉。可特授依前守司徒檢校太師兼侍中行揚州大都督府長史魏國公充淮南節度揚州管內觀察處置營田等使。加食邑七百戶。食實封四百戶。仍賜推誠保德。崇仁守正。協恭贊治。亮節佐運。翊戴功臣。散官勳如故。主者施行。

李璋加恩制

門下。朕若昔大猷。紹天明命。必有獻享之禮。作民恭先。必有褒嘉之恩。自國貴始。翊衛功臣。奉寧軍節度鄭州管內觀察處置河堤等使。光祿大夫。檢校司空使持節鄭州諸軍事。鄭州刺史兼御史大夫。上柱國。平原郡開國公。食邑四千三百戶。食實封一千戶。李璋。世載忠善。躬服儉勤。以后家之洪支。爲帝室之隆棟。入總營衛。則兵師無譁。出乘蕃維。則吏屬不怠。近付京都之籥。外更方鎮之旄。貢職惟修。祀儀獲考。進加功號。申衍邑封。以疇服采之勤。其協勸勞之典。於戲。貴富有危。溢之可戒。祿位匪侈。驕之與期。圖惟慶

譽之終。尙協龍光之施。可特授依前檢校司空使持節鄭州諸軍事鄭州刺史兼御史大夫充奉寧軍節度鄭州管内觀察處置等使加食邑七百戶仍賜翊衛忠果功臣散官勳封如故主者施行。

### 皇伯祖威德軍節度使榮國公承亮加恩制

門下。朕裸獻廟室。燎禋郊丘。内蒙祖考之居歆。外獲神祇之顧饗。嘉我近屬。與有陪輔之勞。揚於大庭。使膺褒顯之福。具官某德義自表。爵齒兼尊。魁然肅艾之材。尙矣神靈之胄。世承厥慶。有跗萼之芬華。朝賴以寧。若翰蕃之嚴密。乃相肆祀。實綏思成。進加奠食之封。申錫詔功之號。於戲。孝恭可以儀宗室。信厚可以化邦人。匪時親賢。孰朕承翼。往肩寵獎。尙協榮懷。可。

### 李日尊加恩制

門下。朕紹膺駿命。稽用上儀。祇事郊宮。並受三神之福。推恩方夏。外交四表之歡。告於有司。錫是在服。推誠保節。同德守正。順化翊戴。功臣靜海軍節度觀察處置等使同中書門下平章事李日尊。躬懷德善。世濟忠勤。奠茲南邦。居有扞城之效。衛我中國。使無疆場之虞。賜之大將之旄。胙之眞王之爵。往踐厥位。知欣戴於寵章。來獻其琛。用協成於熙事。陪敦采邑。褒進文階。載加眞食之封。式允懋功之典。於戲。人之所取。惟怙冒於王靈。國以永存。顧循守於侯度。率時新命。保乃舊邦。可。

### 馮翊郡君連氏等賀皇帝南郊禮畢表

伏以廟饗蠲烝。郊柴昭報。仰格神靈之饗。俯均夷夏之歡。中賀伏惟皇帝陛下。道協欽明。德兼神武。攬御今之皇策。考嚴上之帝儀。祲威盛容。茂實存乎六世。恩典徽數。賚并及於萬方。妾備數先朝。叨榮中禁。親

逢累洽竊用交欣。妾無任。

德妃苗氏上賀皇帝南郊禮畢表

伏以靈承廟祐。祇載郊丘。既來萬國之歡。遂格三靈之祐。中賀恭惟皇帝陛下。徇齊成性。容廣膺期。神罔時恫。方紹休於大業。聖爲能饗。乃獲考於上儀。妾逮侍先朝。親逢盛事。觀瞻有煒。欣賴實多。妾無任。

賜太子太傅致仕梁適太子太師致仕張昇特赴闕南郊陪位詔

朕肇稱圭幣。祇見郊宮。嘉得萬國之歡心。以承配天之大事。永念元老。著勳先朝。當與辟公。序于祠位。冀能顯相。綏我休成。可發來赴闕南郊陪位。故茲詔示。想宜知悉。

賜允太子太傅致仕梁適陳乞不赴南郊陪位詔

勅梁適。省所上表。遞到詔書一道。令臣赴闕陪位者。臣以久病不獲。奔走前去事。具悉。朕肅將圭幣。祇見郊丘。嘉與舊臣。協承熙事。乃聞疾疾。旅力尙愆。優老寵賢。義誠難強。

賜允太子太師致仕張昇不赴南郊陪位詔

勅張昇。郊丘大事。羣辟具來。舊老元勳。所宜顯相。乃以疾苦。惻於朕心。尙慎興居。以膺康福。

賜宣徽北院使判大名府王拱辰乞南郊赴闕不允詔

勅拱辰。朕嗣命典神。肇稱吉禮。稽循故事。不敢愆忘。卿既率貢職以來。助祭。又求入覲陪侍郊宮。緬彼都畿。方須鎮撫。永惟重寄。難徇至懷。

賜允守司徒兼檢校太師兼侍中韓琦乞相州詔

勅韓琦。卿以公師之官。將相之位。統臨四路。屏扞一方。寄重任隆。羣臣莫比。雖罹疾。冀卽有瘳。而章書頻頻。來以病告。宗工元老。視遇有加。恩禮之間。然何敢薄。重違懇惻。姑卽便安。

賜守司徒兼檢校太師兼侍中判永興軍韓琦再乞相州詔

卿當國家之多難。任社稷之至憂。實能忠勤。以濟勳績。方均逸豫。適此外虞。煩我元功。良非得已。亦惟體國義不辭勞。今雖尙謀經武之時。非有蒐兵伐罪之事。坐臨諸帥。固可優游。何必舊邦。乃能休養。勉綏居息。以副倚毗。

賜守司徒檢校太師兼侍中韓琦詔

便道之鎮。朝廷故常。來朝京師。朕意所欲。使事曲折。旣當聞知。忠言嘉謨。又所飢渴。雖知勤勤。可不勉哉。

賜韓琦依所乞詔

勅韓琦。奏乞由河陰本路赴相州。安泊骨肉。行李訖徑。乘遞馬赴闕。朝見奏事。訖還。赴本任。稍從私便事。具悉。舊德元功。久於方面。嘉言讜論。所欲亟聞。其來造朝。然後之鎮。義當黽勉。無或告勞。

賜守司徒檢校太師兼侍中判永興軍韓琦乞相州舊任不允詔三道

勅韓琦。卿明德茂勳。具書帝籍。祖考所付。以屏毗朕躬。比辭國均。已會邊隙。故煩元老。屬此憂勤。今羌雖來柔。疆事多弛。經營科治。改命爲難。莫府坐籌。制其大略。雖聞稍憊。冀可少安。義有固然。朕言無戲。

二

勅韓琦。羌夷變態。未易究知。邊塞繕完。所宜申飭。以卿望實。分朕顧憂。當并羣策。以有爲。遂措一方於無

事。乃來告疾。冀得燕閒。主爾忘身。忠賢之義。勉膺重寄。務體至懷。

三

勅韓琦。卿茂德雋功。朝廷所賴。方解政幾之劇。重分疆事之憂。種落綏和。曾渠嚮順。永惟邊鎮。猶恃老成。所須經武之遠謀。及此暇時。而備豫當思體國。無卻告勞。

賜守司徒檢校太師兼侍中判永興軍韓琦乞致仕不允詔

勅韓琦。朕初嗣位。不敢暇逸。惟畏天命。亦惟閔民。蠢茲一方。尙戒羗夷。制變備豫。扞菑禦侮。庶幾元老。克協朕心。若其憚勤。誰與謀此。勉祗厥服。用副至懷。

賜判承興軍韓琦湯藥詔

勅韓琦。任隆三事。寄重一方。比聞經制之勞。或爽節宣之序。特馳使傳。往喻朕懷。宜有分頒。以資衛養。

賜允觀文殿學士尙書左僕射新除集禧觀使富弼辭免乞判汝州詔

卿翊朕祖考。功施於時。德善在躬。終始如一。祠庭置使。實近闕門。邦有大疑。庶幾求助。忠賢體國。義乃可留。而引喻再三。便於出守。重違懇惻。姑卽所安。故茲詔示。想宜知悉。

賜判汝州富弼乞致仕不允詔

勅富弼。卿忠純亮直。爲國元老。朕所恃賴。急於典刑。優游小邦。足以養疾。冀綏福履。來副詢謀。何必言歸。以孤眷囑。

賜判汝州富弼乞假養疾詔

眷我元老。數更悲傷。比飭使人往宣至意。乃觀來諗。未卽康寧。姑順誠懷。勉綏吉祿。

賜判汝州富弼乞赴安州避災養疾詔

比飭使人具宣至意。就令賜告。冀遂寧瘳。卿嚴祗朕命。不敢遑息。顧念吏卒。閱其滯留。觸熱載馳。用忘勤。勤恭以事上。卿實有之仁及賤微。又能如此。忠誠所惻。豈獨朕心。從容小邦。姑以養福。勉綏吉祿。毋恤後。艱。故茲詔示。想宜知悉。

賜判汝州富弼赴闕詔二道

勅富弼。卿中解政機。外分符守。久於窮僻。衛養或愆。優遊京師。可以治疾。謂當趣駕。以副虛懷。

二

勅富弼。久解政機。薦分符守。元功茂德。朕所注心。渴聞嘉猷。以輔不逮。

賜富弼赴闕并茶藥詔

勅富弼。適自州藩來還朝位。眷馳驅之良苦。懼衛養之或愆。當有寵頒。以昭勤佇。

賜判汝州富弼辭免南郊禮畢支賜詔

勅富弼。省所奏免南郊支賜。受釐於神。賚及蠻貊。卿勳德兼茂。中外具瞻。恩典所加。當先羣辟。區區一賜。何足以辭。當驗眷懷。共膺貺施。

賜宰相曾公亮已下辭南郊賜賚不允詔

勅公亮等。朕初嗣服。於祖宗之制。未有所改也。卿等選於黎獻。位冠百工。或受或辭。人用觀政。朝廷予奪。

所以馭臣貴賤有差。勢如堂陛。惟先王之制國用。視時民數之多寡。方今生齒既蕃。而賦入又爲不少。理財之義。殆有可思。此之不圖。而姑務自損。祇傷國體。未協朕心。方與勳賢慮其大者。區區一賜。何足以言。

勅升之。設都置守。綏御一方。付得其材。乃能往。又卿嘉謀美績。簡在朕心。選於羣臣。用有畀屬。申明紀律。臨制事幾。中外踐更。效皆已試。勉祇厥服。於義爲宜。

勅升之。往司官鑰。來次郊園。炎敲之序未徂。跋涉之勤已至。當馳榮賜。以示眷懷。

賜觀文殿學士刑部尚書知亳州歐陽修上表奏乞致仕不允詔

勅修股肱名臣。與國同體。禮當得謝。朕尙難之。況年非告老之時。而勳在受遺之籍。不留屏輔。人謂斯何。姑體至懷。少安厥位。

賜知亳州歐陽修陳乞致仕第二表不允詔

勅修卿勳德之舊。簡在帝心。從容一州。足以休養。而抗奏至於四五。必以田里爲歸。豈朕視遇故老有不足於禮乎。何其求去之果也。欲喻至意。莫知所言。惟於勉留。實副勤佇。

賜知亳州歐陽修第三表並劄子陳乞致仕不允詔

勅修省所三上表。並劄子。奏乞致仕。事具悉。卿翊戴三朝。清明諒直。有言有績。著在朕心。重違勤求。外寄藩屏。邦之雋老。不以遐遺。所冀輸誠。常存帝室。而納祿與職。至於再三。雖潔身之風。可激貪冒。願許國之

義未協忠嘉。姑體眷懷。勉膺圖任。所請宜不允。

賜觀文殿學士兵部尙書歐陽修辭。知青州不允。詔二道。

勅修海岱名都。太公舊履。鎮撫一路。朕難其材。卿實元勳。以忠許國。謂當亟往。臥以治之。冀能優遊。寧此東土。

二

勅修卿純誠直諫。中外所知。辭祿就閑。志非有激。進官治劇。義乃無嫌。矧茲東州。可以居息。方之守亳。勞逸殆均。朕命惟行。謂當遄往。

賜答曾公亮詔

嘗裁變異。以戒人君。推之股肱。朕所不取。元勳舊德。實賴交修。譴告之來。必緣象類。明喻朕志。使當天心。庶幾君臣並受遐福。不務出此。而果於辭讓。是惟保身。豈曰謀國。

賜張方平免特支請俸詔

勅方平省所奏劄子。陳免特支請俸事。具悉。卿躬肅艾之材。豫辯章之論。致喪無貳。雖非謀國之時。班祿有差。是乃養賢之意。抗言來諗。引義甚明。重鑿素懷。姑循近制。

賜樞密副使右諫議大夫邵亢乞郡詔

勅邵亢卿先帝所命。以翊朕躬。升執事樞。方觀勳效。遽欲辭位。殆非所宜。衛養少愆。何憂不已。勉共厥服。思協朕心。



賜皇伯新除彰化軍節度觀察留後安定郡王從式乞免新命不允詔

勅從式卿躬雋乂之材出神明之胄選於宗室則屬近而行尊聞在朝廷又年高而德邵膺茲褒顯人以爲宜勉服官封永綏吉祿

賜涇原路經略使蔡挺茶藥詔

卿方用時材出分帥路適茲寒苦良已勤勞特推撫賜之恩以示旡懷之意

賜天章閣待制知渭州蔡挺獎諭詔

封疆之虞責在將帥厥有績效不忘於心卿久以才稱外分方任乘機踐事能兆厥謀板築告功於疆就募保彼居圉可無後憂倚言若茲朕所嘉歎

賜知唐州光祿卿高賦獎諭詔

召杜南陽世稱循吏其亡久矣朕尙思之卿招懷飢流墾闢荒梗繕修陂塲績效具昭前人之良何以逮此閱奏歎美不忘於心

卷四十八

內制詔書 批答 口宣

賜天章閣待制知審刑院齊恢獎諭詔

勅齊恢省所奏據大理寺日奏司狀四月一日已前下寺公案並已斷絕無見在事具悉卿以才被選典

領祥刑。蔽罪讞疑。遂無留獄。囹圄空之隆。朕庶幾焉。閱奏歎嘉。不忘乃績。

又賜知審刑院齊恢獎諭詔

勅齊恢。狂獄之留。易以爲戒。卿躬有美行。服在近班。典茲祥刑。致用明慎。濟之敏給。廷讞用空。吏稱厥官。朕心所喜。

賜勅獎諭審刑院詳議官大理寺詳斷官等

勅趙文昌等。省知審刑院齊恢奏。據大理寺日奏司狀。四月一日已前下寺公案。並已斷絕。無見在事。朕初嗣服。德化未孚。永念元元。多罹狂獄。汝等並膺擢任。在讞疑。能勵厥官。以無留事。覽奏歎尙。不忘於懷。

又賜獎諭審刑院詳議官大理寺詳斷官等

勅趙文昌等。四方罪獄。常患稽留。豈唯吁嗟。或以瘵死。汝等能勤且敏。論讞用單。閱奏念勞。朕心以喜。

賜勅獎諭權大理寺少卿蔡冠卿

勅蔡冠卿。省知審刑院齊恢奏。據大理寺日奏司狀。四月一日已前下寺公案。並已斷絕。無見在天下之獄。決於大理。汝能審克。丕蔽厥成。來讞之疑。遂無留者。惟明以敏。朕實汝嘉。

賜特放諫議大夫知潭州燕度待罪詔

卿受命方隅。助宣德化。姦凶弗率。乃觸大誅。引慝自歸。謂當譴黜。萬方有罪。責在朕躬。雖爾長民。豈專任此。

賜外任臣寮進奉功德疏

卿方以時材外分邦寄備修禧事來會誕辰廣伽梵之勝緣協華封之善意載惟勤至良用歎嘉

賜特放知成德軍韓贄待罪詔

夫婦相殘政之大恥引愆自劾於義爲宜然德化之美厥成在久任斯責者豈特長然

賜特放懷州傅卞待罪詔

勅傅卞先王教民長幼有序厥或不率歸之義刑卿受任方州罪人旣得閔斯弗迪引責在躬美俗之成蓋非朝夕一夫抵冒未足以言

賜答德妃苗氏賀南郊禮畢詔

勅德妃苗氏列職內官逮承先帝祀儀獲考慶慰惟均比覽奏陳具昭誠意

賜答修儀楊氏等馮翊郡君連氏等賀南郊禮畢詔

勅修儀楊氏舊繇德選列職禁闈釐事之成實均慶賴摛文贊喜良慰朕心

賜大遼賀正旦人使茶藥詔

勅卿以膚使之才將善鄰之禮川塗悠遠風氣沍寒永念馳驅當加勞賜

賜大遼賀正旦副使茶藥詔

勅卿夙駕使車遠將信幣方茲寒溼固已勤勞宜申諭於至懷仍就加於寵錫

賜大遼皇太后賀正旦人使茶藥詔

勅卿奉將書幣。更涉川途。方茲沍寒。久於勤勩。宜加勞賜。以示眷存。

賜大遼皇太后賀正旦副使茶藥詔

勅卿將幣造朝。方申舊好。建壇取道。適會祁寒。永惟跋涉之勞。當有匪頒之寵。

皇帝問候大遼皇帝書

嘉生備舍。華歲幾終。惟素講於鄰懽。想具膺於時福。彌加葆衛。永御吉康。

皇帝賀大遼皇太后生辰書

玉燭告和。方御閉藏之候。椒庭集慶。載臨誕毓之辰。具飭使車。肅將禮幣。式脩舊好。申祝永年。

賜南平王李日尊加恩告勅書

勅南平王日尊。朕躬執圭幣。禮成郊丘。無有遠邇。並膺休福。卿鎮撫南服。功昭于時。乃眷忠勤。尙加褒顯。永肩臣節。茂對寵章。

賜溪洞知蔣州田元宗等進奉助南郊并賀冬賀正勅書

勅田元宗。附綏種落。葆衛疆陲。能來獻琛。以贊釐事。忠勤之意。良有可嘉。

賜占城蕃王楊卜尸利律陁般摩提婆勅書

勅卿世荷百祿。躬有一邦。雖道阻荒遐。而志存欽順。具書遣使。航海獻琛。載念忠勤。豈忘歎尙。因加褒賜。式示眷懷。

批答文武百寮曾公亮已下上尊號第一表不允

朕以薄德。嗣膺基緒。繼天理物。常懼弗任。方賴交修。以熙衆治。羣公卿士。外暨庶黎。欲舉鴻名。措之眇質。臣民歸美。爲義則多。揣實揆時。朕猶不取。

批答文武百寮曾公亮已下上尊號第二表不允

王者奉元。以先後天。時憲道以始終人事。以文制禮作樂。以武戢兵豐財。以成萬物之性爲仁。以得四海之心爲孝。惟聖時克。朕無能焉。被之此名。祇有慙德。矧家多難。創鉅未夷。備章而郊。欲止不敢。因自尊顯。良非本懷。

批答宰臣曾公亮已下賀壽星見

省表具之。乾象粲然。官占以告。壽祺之應。於傳有稽。卿等寅亮帝工。阜成邦采。摛文告慶。歸福朕躬。書瑞史篇。已循故事。星隆晷德。尙賴交修。

批答樞密使文彥博等賀壽星見

省表具之。穹旻見象。以告壽昌。嘉與臣民。並膺茲福。卿等進繇德選。登翊事樞。敷奏兆祥。請書史策。忠嘉之意。朕所不忘。

批答富弼

卿有憂國愛君之心。而忠以忘乎已。有經邦信時之業。而用未究其能。夫蓄久而積博者。施之無窮。慮深而計熟。則謀無不獲。此朕所以有望於卿也。矧卿正直不回。姦邪素忌。小人所異。君子所同。是以在外十年。而左右之譽弗及。處躬一德。而搢紳之望愈隆。朕內度於心。外詢于衆。自謂有得。卿其何辭。

批答不允皇伯祖威德軍節度使榮國公承亮辭免恩命第一表

卿相予祠事。既獲休成。膺國寵章。所宜祇受。苟爲謙避。未協眷懷。

批答不允承亮辭免恩命第二表仍斷來章

卿位重朝廷。望隆宗室。駿奔郊廟。助朕休成。受錫爲宜。可無確避。

批答不允承亮辭免

省表具之。受釐于神。人與有慶。矧惟近屬。德齒兼尊。膺此褒嘉。於事爲稱。往其祇命。以副眷懷。

批答不允承亮辭免

省表具之。古者賑膳之福。與同姓共之。矧茲大賚。外及蠻貊。爲吾近屬。相協休成。恩典所加。豈容固避。

批答樞密副使韓絳邵亢知樞密院事陳升之等辭免恩命仍斷來章

省表具之。祭有惠術。賚及庶黎。矧吾政事之臣。當在褒揚之首。膺斯恩典。於體爲宜。毋或終辭。以勤訓告。

批答韓絳邵亢陳升之等辭恩命不允仍斷來章

卿等位爲臣宗。躬相祠事。膺斯褒顯。於體爲宜。往服寵章。可無謙避。

宣答文武百寮稱賀宣德門肆赦

有制。朕升煙泰時。登就吉儀。駐蹕端門。布宣惠澤。臣鄰協豫。黎庶交欣。賴天之休。與卿等內外同慶。

宣答文武百寮稱賀南郊禮畢

有制。朕裸獻清廟。燎禋泰壇。協相祀儀。既嘉勤績。旅陳賀禮。彌見歡誠。賴天之休。與卿等內外同慶。

宣答樞密使以下賀南郊禮畢

有制。朕親稱幣玉。祇見郊宮。能底熙成。實繇顯相。羣靈率籲。黎獻交欣。朕賴天之休。與卿等內外同慶。

賜皇伯祖東平郡王允弼生日口宣

有勅。卿齒尊德茂。屬近位崇。惟時獻歲之期。實兆元精之慶。當加好賜。以助燕私。

賜皇伯祖威德軍節度使榮國公承亮加恩口宣

有勅。朕躬率百辟。褒封萬靈。乃眷親賢。實陪大事。當懋寵嘉之數。以昭褒錫之恩。

賜皇弟岐王顯生日禮物口宣

有勅。卿地親魯衛。德茂間平。方誕毓之嘉辰。有匪頒之故事。當馳膚使。往喻隆恩。

賜皇弟高密郡王生日禮物口宣

有勅。卿德名方邵。爵寵兼崇。誕毓之辰。甫當穀旦。匪頒之禮。式示至恩。

賜淮南節度使守司徒兼侍中判相州韓琦加恩口宣

有勅。卿位高朝廷。德茂百辟。相予釐事。厥有成勞。膺國寵章。是爲常典。

賜判永興軍韓琦生日禮物口宣

有勅。卿位重將旄。望隆宰席。方懋蕃官之績。載臨誕毓之辰。當有匪頒。以昭眷遇。

賜樞密使西川節度使守司空兼侍中文彥博生日。差內臣賜羊酒米麵等口宣

有勅。卿明謨經國。碩望冠朝。方茲誕育之辰。宜有燕私之禮。當加賜賚。以示眷懷。

賜文彥博生日差男押賜生日禮物口宣

有勅。卿才隆國棟。位極臣宗。惟時盈月之良。實兆元精之慶。載臨穀旦。當致異恩。

賜樞密使呂公弼生日禮物口宣

有勅。卿爲皇世臣。掌國幾命。門弧告慶。是謂嘉時。臺餽致恩。式昭厚遇。

賜觀文殿大學士尙書左僕射富弼赴闕茶藥口宣

有勅。卿久辭劇位。外寄方州。惟召節之旣嚴。想朝旂之甚邇。宜頒珍劑。以喻至懷。

賜觀文殿大學士尙書左僕射富弼湯藥并賜詔口宣

有勅。卿屏翰元功。台衡舊德。數更悲覺。有惻朕心。因喻至懷。宜頒珍劑。

賜觀文殿學士刑部尙書知大名府陳升之赴闕朝見并賜茶藥口宣

有勅。卿擁節過都。皦關請覲。方茲炎溽。固已勤勞。當有匪頒。以資輔養。

賜觀文殿大學士尙書左僕射判汝州富弼加恩口宣

有勅。卿望隆時棟。德茂臣宗。方茲釐事之成。爰有命書之賜。往膺褒顯。當體眷懷。

撫問判永興軍韓琦口宣

有勅。卿內辭鼎軸。出撫方垂。載惟蒞事之勤。宜饗齋神之福。特申勞問。以示眷懷。

撫問觀文殿學士陳升之兼賜夏藥口宣

有勅。卿久參台路。方部將符。輯瑞之來。虛懷以竚。宜加勞賜。式示眷存。



撫問鄜延路臣寮口宣

有勅。卿等並膺廷選。外寄邊虞。永念撫循。備更勞勩。方茲妍暖。宜各寧安。

撫問延州涇邊臣寮口宣

有勅。卿等並因材選。外寄邊虞。方履盛秋。想膺多福。特申撫喻。當體顧懷。

撫問河北西路臣寮兼賜夏藥口宣

有勅。卿等時方鬱蒸。氣或疵癘。永惟黎獻。方寄外憂。當有分頒。以助調養。

撫問并代州路臣寮并將校口宣

有勅。卿等方以材能外分寄屬。當此沍寒之極。永惟勞勩之多。當飭使人。往宣朕意。

撫問高陽關路儀散諸軍特支銀鞋錢并傳宣撫問臣寮口宣

有勅。卿等各以選掄外膺寄屬。比更時序。邈在邊防。永懷扞禦之勞。當致拊循之意。

撫問送伴大遼賀正旦人使副涇路相逢賀大遼皇太后皇帝生辰使副口宣

有勅。卿等抗廬出聘。擁傳還朝。方春尙寒。涉道良苦。當加撫勞。以示眷懷。

撫問雄州白溝驛賜北朝賀正旦人使御筵口宣

有勅。卿等並膺朝選。實構鄰歡。擁節在疆。方豫稱觴之禮。馳輶喻指。姑推折俎之恩。

賜大遼國賀正旦人使已下生餼口宣

有勅。卿等奉將鄰聘。來會歲元。永懷跋涉之勞。宜有餼牽之禮。式昭勤遇。當體誠懷。

賜大遼國賀正旦人使却迴瀛州御筵口宣

有勅卿等奉將書幣既獲驩成跋涉川途固更勤勤宜頒燕衍以示眷懷

賜大遼國賀正旦人使見訖就驛賜酒果口宣

有勅卿等奉將鄰聘夙駕使輶既造見於闕庭方卽安於舍館宜加好賜以致誠懷

北京賜大遼賀正旦人使却迴御筵口宣

有勅卿等奉幣造朝抗旛歸國緬懷使節方次都畿特示燕私以將勤遇

雄州賜大遼賀同天節人使却迴御筵兼撫問口宣

有勅卿等抗旛歸國總轡在疆方茲炎歛亦旣勤勤就頒燕衍式示眷懷

就驛賜大遼賀同天節人使却迴朝辭訖酒果口宣

有勅卿等奉將聘禮來會誕期惟鄰好之踐脩嘉使容之飭備當申頒賚以侑燕私

賜真定府路臣寮等初冬衣襖口宣

有勅卿等水澤將堅風飈載厲永懷黎獻方寄外憂當飭使輶就頒篋服

賜召學士馮京入院口宣

有勅卿文備國華學該世務祥琴旣御吉服以朝宜復禁塗往供辭職

賜召滕甫入院口宣

有勅卿夙稱才敏久擅文華當解風憲之嚴以豫論思之密

卷四十九

外制

召試三道

節度使加宣徽使制

門下推轂授師。擁旄乘塞。擅生殺之柄于外。繫安危之體於中。厥有顯庸。宜膺寵數。誕揚孚號。明示庶工。具官某。學足以通大方。謀足以斷衆事。有經天之業。有扞城之材。比以明揚。屢更煩使。遂躋臚仕。良副訃謨。維塞路之要藩。實兵防之重寄。職爾鎮撫。紓予顧憂。蓋爵賞之加。不遺於近小。豈藩維之任。顧可以弭忘。用是疇其展窳之勞。寵以宣猷之號。繫人謀之衆允。匪朕志之汝私。夫任重者其憂不可以不深。位高者其責不可以不厚。號名之美。禮秩之崇。非期假寵以擅榮。茲用論功而取稱。矧夫守國之圍。謀王之師。聯輔相之籍於殿中。居士民之瞻於天下。其思祇慎。以副褒優。可。

翰林學士除三司使制

勅。三司使天下之盛選也。自尙書六官名存實去。而三司之職事所總居多。則非夫仁明肅艾。足以輔世濟物者。奚宜任此哉。具官某。有疏通之才。有直亮之操。閱言崇議。足以經綸王家。高文典策。足以鼓動當世。遂以人望。揚于禁林。若夫施政之後。先生財之本末。蓋嘗深思而熟講。殫見而洽聞。則居天下之盛選。主朝廷之大計。詢考在位。孰如汝宜。夫聚天下之衆者。莫如財。理天下之財者。莫如法。守天下之法者。莫

如吏。維予任汝。其聽勿疑。法之不善者。汝得以議而更。吏之不良者。汝得以察而去。則夫調度之不時。費出之無常。邦用之不給。元元困於征求。而愁怨於下者。直汝之恥也。夫行己有恥。而後可以爲士。矧吾左右。信任詢謀所同。而觀聽之所在者乎。往祇厥官。其亡以寵利而爲士恥可。

誠勵諸道轉運使經畫財利寬恤民力制

夫閔仁百姓。而無奪其時。無侵其財。無耗其力。使其無憾於衣食。而有以養生喪死。此禮義廉恥之所興。而二帝三王。誠勅百工諸侯之所先。後世不可以忽者也。朕夙興夜寐。聽治不怠。囿游宮室之觀。無所增飾。而躬以節儉。先天下之士。然而不忍人之政。考諸先王。未有以及之也。凶年飢歲。民之父子夫婦。猶有不得保其家室。而放乎溝壑。意者吏或不良。不知所以賑救省憂之方。而使之至此耶。今吾別諸道。置使者。使得察吏之良否。而視民之疾苦。輒具以言。而任事者。或不惟朕志之所急。而以侵牟之爲故。甚非所以遣使者慰安元元之意也。夫轉輸天下之財。以給有司之費。皆有常數。而無橫求。誠能御輕重。斂散之權。而禁因緣之姦。則何患乎經入之不足。彼前世良吏。能紓其民。而官事亦不耗廢者。豈有他哉。亦在乎勉之而已。若乃操聚斂之贏。以爲功。而不知百姓與足之義。非惟逆於朕志。而有司考績之法。亦將不汝容焉。朕言維服。其聽毋怠可。

皇姪右衛大將軍岳州團練使宗實可起復舊官泰州防禦使知宗正寺制

勅。先王糾合宗族。而分職以治之。所以嚴宗廟也。宗廟嚴。則禮俗成。而天下治。其事豈可以輕哉。今朕選於近屬。以修宗正之官。亦先王治親之意也。以爾具官某。惠仁孝恭。忠信純篤。故遷厥位。以稱禦侮之實。

而使任事焉。夫士之欲施於政，未有不學而能者。學所以修身也。身修則無不治矣。朕言維服，爾往懋哉。可。

皇姪右衛大將軍泰州防禦使知宗正寺宗實可岳州刺史充本州團練使制

勅。孝子之思慕無窮，而送終有既者，先王之禮也。具官某祇慎克孝，能良於喪，去位家居，三年於此矣。其還位號，復序內朝，朕命維新，往欽無斁。可。

起居舍人直秘閣同修起居注司馬光知制誥制

勅。先王誥命之文，何其雅馴而奧美。雖出命非有司之事，而討論潤色，蓋有助焉。以爾具官某操行修潔，博知經術，庶乎能以所學施於訓辭，俾掌贊書，往諧朕志。可。

起居舍人直秘閣同修起居注司馬光改天章閣待制制

勅。揚雄曰：周之士也貴，秦之士也賤；周之士也肆，秦之士也拘。蓋先王以禮讓爲國，士之有爲，有守得伸，其志而在上，不敢以勢加焉。朕率是道，以君多士，以爾具官某文學行治，有稱于時，故明試以言，使司告命，而乃固執辭讓。至于八九，改序厥職，以伸爾志，是亦高選，往其懋哉。可。

翰林侍讀學士右正言馮京改翰林學士知制誥權知開封府制

勅。學士職親地顯，而開封典治京師，非夫忠厚仁恕而有文學政事之能，孰可以任此。具官某造行直方，受材博敏，踐更中外，休顯有稱，論思禁林，尹正畿甸，詢謀惟允，其往懋哉。可。

范鎮加修撰制

勅昔周人藏上古之書以爲大訓。而孔子春秋天子之事也。蓋夫討論一代之善惡。而撰次以法度之文章。非夫通儒達才有識足以知先王不欺足以信後世。則孰能託尙書春秋之義。勒成大典。而稱吾屬任之指乎。以爾具官某有該通之材。有純潔之操。辯論深博。溢於文辭。論思禁林。時議惟允。則夫案善惡見聞之實。斷是非去取之疑。人之所難。宜以命爾。爾其精思熟考。自勉以古之良史。毋襲近世比事屬辭之失。使來者無所考稽可。

右司諫趙抃禮部員外郎兼侍御史知雜事制

勅某。朕置御史以爲耳目。非更事久而能自稱職。則不以知雜事也。以爾嘗任言責。有猷有爲。行義之修。士人所譽。故遷郎位。使在此官。悉其誠心。迪上視聽。義之與比。時乃顯哉。可。

屯田員外郎韓縝改殿中侍御史制

勅某。朕使學士五人舉二人以爲御史。又於二人擇取一人。而以汝爲之。汝名臣之子。世載榮問。愷悌忠信。學知大方。無蔽于儉人。無撓于大吏。無迪上以非先王之典。而同乎流俗。時汝稱職。往其勉哉。可。

兵部郎中沈立可依前官充三司戶部判官制

勅某。擅一道之財。而開闔斂散之。以給縣官之費。而又察舉吏士之賢不肖。問民之疾苦。與夫入佐三司。而四方之言利者必稽焉。其職事之責等爾。汝以才能屢試。而行義加修。使于東南。歲月久矣。還裨掌計之治。所以慰將命之勞。惟爾博學多聞。固嘗知夫百姓與足之義。古人有言曰。尊其所聞。則高明。行其所知。則光大矣。可不勉哉。可。

度支員外郎充祕閣校理李大臨三司度支判官制

勅某。天下之食貨。皆領於三司。故朕常難於置使。而又考慎其屬以稱之。爾以文學爲官。而政事嘗有所試。清明敏達。可使治煩。往踐厥官。其知所守矣。可。

金部郎中朱壽隆三司鹽鐵判官制

勅某。取於山海之無窮。以助縣官之不給。所以開闔斂散之。不可以無術也。非夫廉辨敏明之吏。孰能任此者乎。爾純行美材。久於煩使。往共厥服。維是勉哉。可。

度支員外郎李壽朋開封府推官制

勅某。朕布大慶於天下。惟士之有能。有爲而不獲盡者。豈一日而忘哉。爾以政事之材。而濟之文學。無所避憚。以修厥官。陷于吏議。失職久矣。尹正幾旬。四方所瞻。姑往佐之。以永民譽。可。

殿中丞充集賢校理陸經開封府推官制

勅某。天下無事。休養生息。百年於此。而京師之人衆矣。獨開封以一尹治之。故朕常慎擇材士以爲之佐。庶幾乎其不勞而治也。爾材茂質美。久於湮阨。而智能彌劭。行義加修。姑使治煩。往其自勉。可。

太常博士充祕閣校理張洞開封府推官制

勅某。開封任重事叢。故常擇才士以爲之佐。爾以文章學問。列職校讎。出試一州。風績彌劭。膺此遴選。往其勉哉。可。

左司諫王陶皇子伴讀制

勅某自天子至於士。未有不待學而成者。今朕欲進諸子於學。求可與居者。而大臣以爾爲言。爾久在諫。工有聞於世。茲惟慎選。可不勉哉。可。

### 樞密直學士施昌言知渭州制

勅。夫出河祕文中。嚴於禁閣。臨渭分闕。外肅於戎亭。進陪侍從之聯。往膺經略之寄。茲爲異數。授受惟艱。具官施某才劭兼人。問望映世。早據素蘊。寢階清塗。南榻計庭。裨贊之功可紀。西廂樞府。論思之効尤彰。洎出總於藩條。且屢制於邊瑣。事經畢舉。政績用成。宜易餘杭之符。就撫氏羌之塞。爾其坐護諸將。善固吾圉。而今而後。無西顧之憂者。繫爾之力。可不勉哉。可。

### 知制誥沈邁知杭州制

勅。東南奧區。杭越重鎮。眷惟師帥之選。屬于侍從之良。宜有褒優。式示毗倚。具官某風姿爽拔。器宇闔深。早登高妙之科。亟躋通顯之列。校文東觀。典學擅乎多聞。演誥西垣。英辭鼓乎羣動。比抗章而請郡。期調膳以奉親。曾未葦年。已聞報政。乃就更於淮海。庶益便於庭闈。載念錢塘之邦。方虛銅虎之守。宜共易□之命。仍選應宿之資。服我新恩。寵爾故里。與夫引會稽之紱。又相萬也。爾惟懋哉。可。

### 龍圖閣直學士知河陽李兌給事中依前龍圖閣直學士知鄧州制

勅。鄧於京西爲一都會。提兵以守。常擇大吏。且有加命。寵榮其行。具官某寬和靜深。方厚篤實。嘗由御史。遂爲諫官。延閣侍從之班。方維帥守之任。焯有績效。見於事爲。序于東省之華。寄以南陽之重。按撫吏士。治軍牧民。敷宣詔條。鎮靖風俗。繫汝能力。往其勉哉。可。



龍圖閣直學士李柬之刑部侍郎充集賢院學士判西京留守司御史臺制

勅古之仕者難進易退。陵夷至於後世。而禮義廉恥幾乎息。恬於勢利者鮮矣。而苟得躁進者不乏於朝。教之未孚。朕甚患之。顧吾左右親近之臣。行義合於古之仕者。宜從其志。使在位之貪者有愧而慕焉。具官某名臣之子。能自修敕。出備蕃維之任。入爲侍從之官。而乃力辭顯榮。退就閑職。別都執憲。地清務簡。特峻秋官之秩。仍通麗正之班。吾惟爾嘉。其往居息可。

知雜王綽吏部郎中直龍圖閣知徐州制

勅某知雜御史於朝廷之士爲高選。非精明彊直不能稱其任也。爾更踐多矣。有聞於時。故從遠方召置此位。乃以病告。至于再三。出臨大州。進直嚴閣。又增郎位。以寵爾行。其亦懋哉。往共厥服可。

集賢校理鞠真卿可光祿寺丞依舊充集賢校理知壽州制

勅某付之千里之地。能禁暴去悍。拊循鰥寡。使良民有以休息。而吏不敢爲侵冤。豈非所謂能者哉。若爾之材。歷選于朝。而久試于外。固時之所謂能者。朕所加省而不忘。今天壽劇郡也。故徙汝以治之。而稽汝歲功。當得遷位。丞於光祿。其往勉哉可。

何郟知永興軍制

勅朕初卽位。慎考俊乂之臣。付之方鎮。具官某廉清質直。敦大詳敏。藝文之學。政事之材。左右具宜。以有聲績。作國西屏。雍維大都。鎮撫一方。老成是賴。序遷厥位。往牧其人。其勸猷爲。以膺任屬可。

潘夙轉官知桂州制

勅某桂於西南爲一都會蠻夷荒忽鎮撫有宜故於用人常慎其選爾清明敏達寬博惠和更事有功簡在朝論遷序卽位往其勉哉可

尙書左丞余靖制

勅朕有大賚雖疏逖微細必加焉況於位序高任屬重寵章徽數其可略乎具官某政事之材藝文之學踐更中外光顯有聲濟登大官鎮撫荒服能率厥職相時休成衍食序勳往其祇服可

天章閣待制司馬光制

勅陟降左右司朕躬之闕者至親篤信之臣也邦有大賚其可以後而忘乎具官某政事藝文操行之美有聞於世簡在朕心相時明禋庀事惟謹進階序爵其往懋哉可

尙書戶部郎中知制誥張瓌制

勅朕宗祀先帝以配昊天而均福釐於在位疏遠微賤無遺者矣又況於侍從之臣乎具官某德厚資深志方行潔安於義命爲世寶臣考慎樂禮相時大事進階序爵其往懋哉可

翰林學士知制誥賈黯轉官加勳邑制

勅朕初卽位奉行先帝故事不敢有廢也具官某剛毅篤實閱深博敏先帝所遺以論思左右者也其遷厥位加賜恩典其往欽哉可

翰林學士知制誥權三司使蔡襄轉官加食邑制

勅朕祇若先帝之初大賚以勞天下職親地禁之臣皆先帝所遺以助朕者也其可以後而忘哉具官某

率德秉義。以綏寵祿。主國大計。功昭于時。班命有章。往欽無斃。可。

翰林學士兼侍讀學士知制誥充史館修撰王珪轉官加食邑制

先帝投天下之艱。以屬朕身。永惟所與濟此者。豈非左右之良哉。具官某秉哲迪義。士民所望。論思潤色。有補於時。大賚之恩。外通四海。況於親近。豈可以忘。往服寵章。愈其慎惑。可。

翰林學士知制誥充史館修撰范鎮轉官加勳邑制

勅朕雖哀恫。永惟付託之重。不敢忘先帝寵綏海內。褒厚羣臣之意。具官某敦大閱博。清明敏達。職親地密。爲國信臣。遷序位等。申之恩典。惟慎厥服。往膺顯榮。可。

翰林學士知制誥權知開封府馮京轉官加勳邑制

先帝以盛德成功。克終天祿。眇然在疚。永念嗣訓。非左右之良。孰與濟此哉。具官某秉哲蹈義。士民所望。尹正京邑。善聲流聞。邦有大賚。當由貴始。往膺榮祿。無替厥修。可。

集賢院學士余靖轉官加勳邑制

先帝君臨天下。餘四十年。功德之所及博矣。非文武之士協力中外。何以致此哉。在後之侗。纂修成法。敢忘大賚。以勞衆工。具官某敦大閱深。清明敏達。蕃屏帝室。厥功茂焉。恩典寵章。往其欽服。可。

集賢院學士李柬之轉官加勳邑制

先帝棄天下。不及班命。以勞羣臣。朕繼大統。其承厥志。具官某廉靜忠恕。濟以詳敏。能紹世美。爲時名臣。膺服寵章。往其思勵。可。

龍圖閣直學士給事中呂公弼改工部侍郎制。勅褒德序功制爲祿位。先帝所以熙庶政也。朕雖在疚。所不敢忘。具官某保身慎行。舊有榮聞。陟降左右。是爲世臣。惠綏西南。風績尤顯。冬官之貳。其往欽哉。可。

待制司馬光禮部郎中制

勅左右侍從之臣。皆先帝所遺。以助興政理者也。有勞可錄。朕敢忘哉。具官某行義信於朝廷。文學稱於天下。比更任使。會課當遷。進位二等。以嘉爾績。爾方以經術入侍。而又兼諫爭之官。往其思致。厥身使朕之聰明無所不通。爾亦維有無窮之聞。可。

周沆右諫議大夫制

勅堯舜黜陟幽明之法。其詳不見於經。蓋其考績之次序。必始於朝廷之貴者。朕率是道。進退百官。故於邇臣。無有私德。以爾具官某忠厚謹潔。惠和寬博。嘗被方維之重任。久參侍從之要官。內外之勞。皆宜有賞。而以稱士失實。控於吏議。爲郎武部。七歲于茲。著論積功。進位西省。夫職在盡規之地。官又以諫爲稱。維是將明。往其思勉。可。

右正言知制誥知越州沈邁起居舍人制

勅列名侍從。分職方維。厥有庸勳。朕其甄序。具官某端良足。以有守。精敏足。以有謀。爲時寶臣。典掌明命。出撫州部。治聲流聞。內外之勞。進遷惟允。序官二等。以懋厥勳。是謂寵榮。往其祇服。可。

掌禹錫趙良規並秘書監制

勅秘書圖籍藝文之府而置監在光祿衛尉諸卿之右其材實德望當有以稱之以爾具官某等歷官茲多服采惟謹序于卿位簡在朝廷宣布詔條討論典故久於任使亦各有勞宜推增秩之恩以信懋功之法往從官次無或不祇可

王綽秘書少監制

勅朕初嗣位大賜天下文武在位各以序遷具官某出入踐更名聞休顯奉常之副用勞厥勤乃辭官榮以避親諱綏子孝子改貳秘書往服寵章靖共無斁可

光祿少卿李丕緒少府監制

勅少府古官於朝廷之位尊顯矣具官某行義祇飭材能敏達外更器使績用每成有司以聞又當增位往膺秩物無怠厥修可

司封郎中宋任太常少卿制

勅士以序遷至於卿位亦榮矣非才智有以任事行義有以保身豈能致此具官某中外踐更久於郎選明習衆事見稱於時往卽厥官勉之無斁可

江南西路轉運使呂公孺太常少卿制

勅某太常兼夔與伯夷之事非夫藝實德望有以過人孰宜爲之貳也爾名相之子以才見稱出入踐更休有風績序遷厥位其往欽承可

職方郎中通判太原府馬從先太常少卿制

勅某太常禮秩異於諸卿。非文學入官。則不得爲其貳也。以爾行治之美。才能之敏。踐更多矣。皆有可稱。會課于朝。躋登此位。往求自稱。惟旣厥心可。

### 解賓王太常少卿制

勅某。今之太常兼襲與伯夷之官。非夫寅恭清明博習於禮樂。則孰能爲之貳也。今朕考行序勞。而以爾爲貳於太常。維爾嘗以材稱。而屢更任使。雖身在外。而名位亦云顯矣。所以稱此者。可無勉哉。可。

## 卷五十

### 外制

#### 三司鹽鐵副使陳述古衛尉少卿制

勅某。考課黜陟之法。雖疎。逃未嘗不信。又況於近而顯者乎。具官某。以才自奮。能世其家。出入踐更。休有風績。列卿之貳。其往勉哉。可。

#### 郭永可光祿少卿制

勅某。外廷之位。能至於九列者。少矣。具官某。踐更衆職。功善自昭。年除歲遷。以致卿位。進寵一等。往承惟休。可。

#### 林億司封郎中制

勅某。朕有官祿慶賞。以序功。而其施始於朝廷之近。爾以藝文被選。而多所踐更。通籍禁中。庀官闕下。序

遷卽位。旣極左曹。往卽寵榮。愈其勵勉。可。

薛求司勳郎中制

勅某。朕布大號。在廷文武之士。皆得進官一等。而伐閱當遷者。又各得以序遷。爾中外踐更。以才自顯。膺此恩典。往其勵哉。可。

權提點成都府路刑獄齊恢度支郎中制

勅某。朝廷選寔才臣。以使諸路。而察庶獄之不辜。厥有庸勳。朕當甄序。爾才能行義。士論所稱。會課有司。實應遷法。往膺休顯。其愈懋哉。可。

淮南轉運副使張景憲金部郎中制

勅某。入佐三司。出使諸路。皆朝士大夫之高選。有勞當錄。其可忘哉。爾行義之修。才能之仰。見稱當世。簡在朝廷。會課進官。往其欽服。可。

三司鹽鐵副使陳述古朝奉大夫司封郎中三司度支副使趙抃戶部員外郎加上輕車都尉權

三司戶部副使張燾朝散大夫刑部郎中制

勅某人等。朕初嗣位。奉行先帝故事。不敢有廢也。具官某等。行義稱於世。才能見於朝。佐國大計。爲功多矣。序遷位等。其往欽哉。可。

朱處約祠部郎中制

勅某。爾嘗爲御史。持論不阿。出守方州。稍遷使任。序功增秩。邦法有常。往懋厥修。以須進選。可。

孫抗孫琳祠部郎中制

勅某人等。都水之官廢久矣。朕修之而用爾爲丞。爾維才能懋。建厥事。有司論課。當以時遷。進序名曹。往祇無斃可。

提點福建路諸州刑獄公事王陶祠部郎中制

勅某。朕選置使者。清明於諸路。所以待之非輕也。爾踐更衆矣。才美有稱。備在遠方。能修其職。進遷位等。往愈懋哉可。

權提點廣南西路刑獄杜千能祠部郎中制

勅某。朕初卽位。羣臣朝者皆增位一等。有功當遷。又皆得以序進。爾材諳行治。見稱於衆。奉使于外。治聲流聞。會課進官。往其祇服可。

三司戶部副使張燾兵部郎中制

勅某。考績三歲。進官一等。先帝所以勵羣臣也。具官某。秉哲迪義。有聲于時。能勵厥修。以宜官政。序功增位。其往欽承可。

苗振職方郎中制

勅某。尙書郎中。序列五品。其於朝廷之位。亦已顯矣。爾用選擢。嘗更任使。積功久次。得在此位。所居三歲。宜進一官。至今而後得遷。乃以爾嘗有謫。朕於黜陟。豈苟然哉。自爾取之而已。往思自勉。以稱褒升可。

王舉元刑部郎中制



勅某薦非其人而與其罰古之道也爾久以才實外更任使風績之邵靡人不稱而任舉有失法當坐免雖更教令猶褫一官以懲上報之稽而塞人言之衆膺踐厥服往其勉哉可

侍御史知雜事判都水監王綽刑部郎中制

勅某御史皆吾耳目之官而折百工以法刑之中者也考其功狀在法當遷則吾豈可以忘哉以爾具官某忠厚諒直有稱於世踐更衆職皆以能聞故寘之臺中位次執法名實之善尤于人言姑疇積功序進一等位亦顯矣往其勉哉可

胡況都官郎中制

勅某爾以才行自昭于時外分將符內序郎位致勤厥職三歲于茲稽狀有司法當增位進遷一等其往懋哉可

周燮都官郎中制

勅某褒善錄勤邦有常法爾以才能行義登顯朝廷序正郎位三年於此矣進遷一等以懋厥勤勵治我民乃其能稱可

宋孝孫比部郎中制

勅某褒功錄善邦法有常爾共厥官服采惟謹久於郎選會課當遷愈其勉哉以稱新命可

監在京都鹽院錢暄比部郎中制

勅某古者官有職而命有數非有職不足以序羣才非有數不足以差衆功今官有品猶古之命數也命

之數。自一推而上之。至于九官之品。自九推而上之。至於一大略。蓋無以異。而其詳如此不同。唯其欲得賢者之在位。則古今一也。爾以才能行治。進序於朝。年除歲授。既得列於五品。久於職事。法又當遷。其亦可謂寵榮光顯矣。其思自勉。以稱吾欲得賢者在位之意哉。可。

三司戶部判官充祕閣校理王繹工部郎中制

勅某。三司理財之吏。與館閣校文之官。皆朝廷雋乂之選也。其於進秩。有異數焉。爾以藝文世家。而祇慎謹飭。久在此位。有勞當遷。序于名曹。其往思稱。可。

李章屯田郎中制

勅某。褒善錄勤。朝廷之政。爾才能行治。比見推稱。會考績之法。當增位序。進遷一等。其往懋哉。可。

周延雋屯田郎中制

勅某。郎中五品而司田。以待藝文之士。爾大臣之子。強學贍辭。出典一州。序功當進。往祇厥位。其克懋哉。可。

職方員外郎竇綱可屯田郎中制

勅某。漢明不以郎官假貴戚。以出宰百里。爲不可以非其人。今之郎選。其重非漢比也。而郎中序于五品。其授豈可以輕哉。爾以文藝起家。以吏能從政。序遷此位。嘉寵爾勞。往服訓辭。勉求報稱。可。

職方員外郎卜伸可屯田郎中制

勅某。郎中序列三等。其品皆爲第五。非積功久次。則不得至焉。爾以文藝入官。而濟之謹潔。久於任使。當

得進遷。茲維爾階。其往祗服可。

職方員外郎朱從道可屯田郎中制

勅某。尚書郎選於今爲重。而郎中列于五品。爾精敏強果。號爲才臣。積功累勤。以致此位。往共厥服。其愈懋哉可。

晁仲綽鄭隨可屯田郎中制

勅某。郎中序列五品。非久於任使。有勞而無罰。則罕得至焉。爾以文藝起家。以才能爲吏。稱功累善。當得進遷。往其懋哉。思稱新命可。

太常博士權御史臺推官杜訴可屯田員外郎制

勅某。尚書郎位。吾所量也。爾名臣之子。行義修飭。才能有譽。而職事無過。審官稽狀。當以時遷。新命維休。往其祗服可。

駕部員外郎薛仲孺可虞部郎中制

勅某。郎中五品。於朝廷爲顯位。爾悉心爲吏。才敏見稱。嘗所踐更。咸有功最。進遷惟允。其往懋哉可。

提刑楚建中可司封員外郎制

勅某。朕置使者以察天下之獄。其選擇甚難。而視遇之甚厚。序功錄善。其可忘乎。爾行治才能。有聲於世。服官惟稱。會課當遷。以懋爾勞。往其祗訓可。

侍御史邢夢臣可司封員外郎制

勅某侍御史於御史之選爲高。而尙書郎以司封爲前列。爾才能行義。嘗見推稱於有言職。爲一臺高選。任責未久。序勞當遷。往副司封。愈其自勉。可。

都官員外郎充祕閣校理王异可司封員外郎制

勅某爾以藝文高第。進仕朝廷。廉靖謹良。有稱於世。校文祕閣。典事方州。甄序歲勞。進遷惟允。往共厥服。其愈懋哉。可。

權梓州路提刑都官員外郎張師顏可司封員外郎制

勅某爾修潔精敏。達於從政。嘗更任使。皆以才稱。故以一路之庶獄。寄之督察。方行就事。會課當遷。往懋厥修。以求稱職。可。

度支員外郎充崇文院檢討晏成裕可司封員外郎制

勅某爾以文藝之學。在討論之官。丞于太常。典掌禮樂。有勞可樂。其以序遷。於世大家。爾爲能保。往思淑慎。無廢厥勤。可。

祠部員外郎充祕閣校理蔡抗可度支員外郎制

勅某序功錄最。邦法有常。惟敏厥修。乃能自稱。爾以校讎之選。受吾蕃屏之寄。材能行治。見譽於時。而會課有司。番遷厥位。官無虛授。往可勉哉。可。

權利州路轉運使度支員外郎蘇案可兵部員外郎制

勅某朕欲明清於吏民。而擇使以蒞之。非特使之轉貨財以贍有司而已也。爾彊敏謹潔。達於從政。往充

其選克有成勞。序進一官。愈祇乃服。可。

三司鹽鐵判官度支員外郎集賢校理王益柔可兵部員外郎制

勅某。任賢使能。而繼之以黜陟。先王之所以治。未有改此者也。爾惟賢。故序于校讎之職。爾惟能。故列于會計之官。稽狀有司。法當增位。其遷一等。以懋爾勞。可。

太常博士充集賢校理同脩起居注判三司度支句院錢公輔可祠部員外郎制

勅某。序功黜陟。邦法有常。爾文章博美。行義純潔。施於政事。又以材稱。會課進遷。蓋維常法。往祇厥位。其亦懋哉。可。

國子博士朱延世可虞部員外郎制

勅某。尚書虞部掌天下之山澤。而脩其時禁。郎官職事雖廢。而官名猶貴於時。非歷試而有勞。卽不得以在此位。若爾之潔廉畏慎。蓋知所以自保矣。其愈懋哉。可。

比部員外郎鄭伸可駕部員外郎制

勅某。爾勤敏謹潔。以脩厥官。會課有司。當得遷位。司輿之副。其往懋哉。可。

都官員外郎許遵可職方員外郎制

勅某。爾進以藝文。而兼通律令之學。故於爲吏。常以才稱。第課有司。當得進位。祇予新命。厥往懋哉。可。

都官員外郎陳汝羲可職方員外郎制

勅某。審官之法。吏有勞而無罪。至於三歲。則遷位一等。亦所以勸也。爾文學政事。有稱於世。久更任使。會

課當遷往服寵章。愈其思勵。可。

都官員外郎章俞可職方員外郎制

勅某。爾以藝文之學。政事之材。所更滋多。皆有善最。三載考績。法當進遷。往踐厥官。愈其思勉。可。

韓繹可職方員外郎制

勅某。三歲一遷。審官馭吏之常法也。然非智謀忠力。能舉其職事者。亦何以稱此哉。爾纘德善之慶。而以藝文自奮。施於吏政。強敏有聲。膺此寵榮。其知勉矣。可。

都官員外郎劉牧可職方員外郎制

勅某。朕置使者以察諸路。而選才士以佐之。爾行義智能。比見稱述。往其職事。會課當遷。懋勉厥勤。以稱官使。可。

都官員外郎王易知可職方員外郎制

勅某。爾久於試用。常以才稱。出守一州。可有爲矣。而有司會錄。當得進官。往旣厥心。以祇予訓。可。

屯田員外郎謝景初可都官員外郎制

勅某。周官司土。三歲則稽士任進。其爵祿而方。今審官之法用焉。爾名臣之子。操行修潔。文學政事。有稱於時。審官序勞。當以時進。往踐爾位。厥維懋哉。可。

屯田員外郎何世昌可都官員外郎制

勅某。尚書之實多廢矣。而郎位尙爲朝廷所重。爾藝文操行政事之材。推舉進遷。以至於此。出佐州治。論

功應條改序中行。往其祗服可。

屯田員外郎陳安道可都官員外郎制

勅某。士夫奉法循理。以共厥服。至於三歲而無咎罰。其可無進遷之法。以慰勉之哉。爾藝文起家。而行義脩飭。比更器使。實以才稱。往服寵章。愈其思勉可。

屯田員外郎晁仲約可都官員外郎制

勅某。褒善錄勤。朝廷之政。爾清明敏達。士類所稱。典治一州。風政彌劭。有司序績。當得進遷。往服寵章。愈其思勉可。

屯田員外郎唐諲可都官員外郎制

勅某。爾藝文行治。進有可稱。爲郎尙書。三年於此矣。職事之最。法當進遷。愈其懋功。以對新命。可。

屯田員外郎林大年可都官員外郎制

勅某。士之有爲者。豈必慶賞而後勸哉。然黜陟者。勵世之通法。而爲天下者。所不能廢也。爾被文蓄德。從政有聲。會課當遷。序官一列。往其勵勉。膺此寵榮。可。

太常博士胥元衡可屯田員外郎制

勅某。仕於朝廷者。有勞而無罪。至於三歲。則遷位一等。所以明有勸也。爾名臣之世。行義脩飭。以才自奮。從政有稱。往服寵章。愈其思勉可。

太常博士李處厚可屯田員外郎制

勅某爾政事之材藝文之學潔身慎行皆有稱試請利權是亦煩使序功錄最當得進遷列職南宮往其祗服可

比部員外郎呂元規可駕部員外郎制

勅某褒善錄勤邦有常法爾護軍糶將邊漕悉心營職才諳見稱會課序遷往其祗服可

吳充轉官制

勅某士之好德樂善而無求則爵賞有不足以勸焉而爵賞固不廢乎無求之士爾文章行義政事之實士友之所服朝廷之所稱然方試爾于外以觀爾爲而審官上爾歲月之勞法當遷位一等此雖不足以爲爾勸而天下至公之法不可以廢者也往其懋承之哉可

劉敞轉官制

勅某褒善錄最朝廷至公况吾邇臣在法當陟具官某文章博美政事詳敏心通道德之意躬率仁義之行久於侍從實允詢謀付以方維又能鎮撫甄序乃績進遷厥官朕命惟休往其祗服可

劉覺等轉員外郎制

勅某官所以制祿位之等職所以敝才分之宜視職之廢舉與行之失得而下上其官此吾爲天下立法以廢置賞誅之大體也爾持其行而無失修其職而無廢三年於此矣不可以徒置也宜有賞焉序進一官往欽乃服可

王伯恭轉官制



勅某。方今仕於朝廷者。率三歲而一遷。論者患其不足以勸功。然日月久矣。能祇慎不怠。免於罪悔。則亦宜有以褒嘉。此朕所以使爾得遷之意也。士之爲義。蓋有常心。何必利焉。然後知勸。可。

王允轉官制

勅某。爾能誦先王之言。以得祿位。施於有政。又以才稱。丞于殿中。歲月久矣。博士之選。儒者所宜。以爲爾官。其往祇載。可。

李正臣轉官制

勅某。書曰。欽哉。欽哉。惟刑之恤哉。此吾所以建審刑之職。而擇取智能之士。以爲詳議之官。爾以藝文起家。又能明習法令。靖共厥位。有伐當遷。姑使序于太常。而仍其覆讞之事。往爲審克。以稱欽恤之意。可。

劉叔寶轉官制

勅某。士之修身慎行。宣力四方。豈皆以取爵祿之報哉。蓋其志有以謂義當如此。然而爵祿必稽行治勞烈而加焉。今吾序進爾官。以有積功之實。義不可以無報也。在爾自爲。則欲知夫義當如此。而無志乎寵利。然後可以事君。往其勉哉。尙有終譽。可。

卷五十一

外制

樞密院編脩周革轉官制

勅某語曰。前事不忘。後事之師也。今吾樞密之府。自祖宗以至於今。不啻百年。捍患持危。應變之大計。與夫將相論議之臣。密謀要策。有補於世者。皆具在此。而文書質亂。淆雜而無紀。亦何以待後事乎。故擇能臣。使序次焉。而爾以才稱。實當其任。今遷爾位。唯是勉哉。可。

屯田員外郎任迥等加勳制

勅某等。朕獲休享于神。而嘉與在位。同其福祿。爾等並由材選。列在郎位。相時釐事。能勵厥勤。甄序有差。往其祇服。可。

張慎修等改官制

勅某等。士之選於吏部者多矣。以貌以言而取。吾皆不足以得之。此吾所以推耳目之任。而付之刺舉之臣。使各察其所部。而以賢才告上。今爾等從政于外。而爲刺舉者所稱。故吾召見于庭。而秩以省寺之官。往其勉思所以事君。無使稱爾者受不任之咎。可。

徐師回等改官制

勅某等。詩曰。不解于位。民之攸暨。蓋吏能夙夜不懈於其職事。以無過失。然後民得以服勤。而有勸功樂業之意。吾所以制爲祿位。以待天下之吏。以時論其功狀。而進退之。凡以爲民也。爾等並列於朝。而久於其職。序遷爾位。惟是勉哉。可。

磨勘轉官制二道

勅某等。有司考爾等之伐閱。而揚爾等於朝廷。朕親覽焉。皆應遷法。夫命官賦祿之事。朕非輕之也。維以

章有德序有功名在審官則三歲而一遷亦維以閱夫職事之勞而勉之盡力爾等勿謂名器之可計日以自取也而無報上之意焉可

二

勅某虞以九載黜陟庶官周以三歲誅賞羣吏其爲法異而勸沮之意同爾之積功實應遷法序進厥位維以勸能書不云乎德懋懋官功懋懋賞爾則善也朕何愛焉可

明堂宗室加恩制

勅某朕旣肆祀於明堂而大賚以布神之福爾列名屬籍序位內朝肅雖在庭克相釐事以差受寵其往懋哉可

皇姪孫左屯衛大將軍登州防禦使世永改隴州防禦使制

勅朕永惟太祖皇帝德加於後世博矣而諸孫爵位莫有顯者甚非所以惇敘九族承宗廟之意也具官某躬率德義克承厥休方將營衛之屯而領兵防之任其正使號稱朕志焉可

皇姪右衛大將軍蘄州防禦使從古登州防禦使制

勅朕選於近屬以治親親唯賢與能宜在此位具官某躬率得善自昭于時以選攝事久勤不懈其遷使號而正其職服之名焉往踐寵榮愈思慎懋可

皇姪曾孫太子右內率府率令磋右千牛衛將軍制

勅某治天下自人道始而以治親爲先務爾序于屬籍率履不違遷率東宮十年於此矣進踐祿次往其

欽承可。

鄭穆太常博士制

勅某士之著籍審官者。雖在疏逖。猶三歲而一遷。又况以才被選。有職事於禁門之內者哉。嘉爾言行。發聞于世。膺此恩典。往其欽承可。

錢袞太常博士制

勅某太常古宗伯之官。而博士掌其掾法。增損因革。皆合於事。久而不失先王之禮意。然後可以爲能。其任固已重矣。今雖職廢。而非文學出仕。則不得以名官。爾以敍進而膺此選。其尙能勉以求稱哉。可。

集賢校理周豫太常博士餘如故制

勅某籍於審官之士。雖身在外。有司會其伐閱。歲滿輒遷。況於以才進選。而列職祕近者哉。爾維峻良。膺此恩典。往其祇勵。以服寵榮。可。

楊南仲太常博士制

勅某爾文學藝能。見稱於世。服官惟謹。克以有勞。丞于太常。是謂華選。遷秩博士。往其欽哉。可。

姚原道太常博士制

勅某爾以藝文出仕。而才諳見稱。備任遠方。有勞當錄。博士之選。往其欽哉。可。

晏崇讓太常博士制

勅某爾名臣之子。行義修飭。能以藝文自奮。而於職事有勞。序遷厥官。其往祇服。可。

劉溫太常博士制

勅某爾丞祕書三年矣。故稽爾功狀。秩于太常。爾行義才能。有稱於世。無曰官小。往其欽哉。可。

柴餘慶國子博士制

勅某爾於爲吏。才敏見稱。會課有司。當得遷位。博士之選。往其勉哉。可。

邵亢太常丞制

勅某古者尙賢而輕爵。好藝而賤祿。所以士樂羞其行而爲時用也。爾列于東宮之職事。三年於此矣。羣牧之任。開封之選。皆能稱職。遂佐三司。其序爾功。進官一等。若爾之藝文政事。吾豈有愛於爵祿乎哉。往懋厥修。以需其後。可。

蔡說殿中丞制

勅某宗祀之成。慶覃疏逖。爾久於常選。丁此殊恩。甄序有榮。往其祗服。可。

晁仲熙殿中丞制

勅某爾以謹潔能不失其世守。故積功久次。致位於朝。往佐一州。又應遷法。愈其懋勉。以稱褒嘉。可。

王元甫殿中丞制

勅某吏之有籍於審官者。三歲一遷。所以勸勞也。爾以才備任。積課應條。往服命書。愈其思勉。可。

高應之國子博士張侏太常丞范褒殿中丞制

勅某等爾等親吾民于外。而吾使有司會課于中。皆能有勞。以應遷法。夫上之爵賞無私德。惟以治人臣。

能率職以治人。則可謂能報上矣。各踐爾位。惟時勉哉。可。

胡掖殿中丞制

勅某。汝官在東宮。而得列於朝廷之位。有司奏課。當以時遷。夫祿所以等功。位所以序德。朕所以命汝者。每加厚矣。汝所以報稱者。亦可以勉哉。可。

王介祕書丞制

勅某。朕設科以來。異能之士。而親發策問之。爾言不阿。而學問多中乎義理。其遷厥位。以嘉爾之能言。夫士無不能。有不爲爾。若爾之修潔有志。而濟之以明敏之才。惟所施焉。將無不至。況於一官之小。豈以不稱爲患也哉。可。

毛篋祕書丞制

勅某。古人有言曰。無常產而有常心者。唯士爲能。夫所謂士者。不以無常產而變易其心。又奚俟於爵賞。而後勸哉。然士之有功。則爵賞加焉。天下大公之法也。爾以進士起而序於王官之列。出長一邑之民。有勞而無罪。三年於此矣。其使遷秩。以信大公之法。朝廷之位。亦加顯矣。所以爲士者。可不勉哉。可。

許懋傳顏並祕書丞制

勅某。爾雖任職于外。而功罪之籍。實在審官之府。以時會課。於法當遷。夫三歲而序一官。在會之所同然。材實行治。不有以稱其位。則孰以爲非苟得也。爾以藝文自奮。而由稱舉。以至於此。其知之矣。可不勉哉。可。

陳舜俞祕書丞制

勅某爾以賢良應詔朕嘗親冊而秩以京官幕府三年序遷一等此特有司之常法爾豈所以待異能之士哉往其勉之以俟時用可

句士良祕書丞制

勅某爾佐著作于祕書三年矣審官稽狀當進一官惟爾以文藝起家而以吏能爲邑往欽新命其克勉哉可

國子監直講商傅光祿寺丞制

勅某爾讀羣經而能通知其義故選於衆以教國子有司稽任當以勞遷往服爾官愈其思懋可

張璘光祿寺丞制

勅某爾父爲吾執政之官而爾能夙夜祗飭以修其職事可謂能世其家矣今有司會課而吾以爾丞于光祿往思勵勉以永燕譽之終哉可

王岫光祿寺丞制

勅某詩曰維其有之是以似之以爲賢者之後功臣之世非有以存之則無以似續其前人也爾以蔭籍入官而能舉其職以應有司之遷法可謂知似續其前人矣丞于光祿其往勉哉可

王佺光祿寺丞制

勅某爾大臣之家賢者之後能自策勵不墮其官序勞當遷往踐厥位無忝爾祖乃惟顯哉可

奏舉人前陝州節推郎凡衛尉寺丞制

勅某。選於吏部者多矣。非使在位者舉其類。則善人豈能自進乎。爾能勵厥官以多薦者。丞于衛尉。其愈祇修可。

孫琪衛尉寺丞張次元大理評事制

勅某等。材施於一邑。知效於一官。至于三年而無職事之負焉。不可以無報也。序進一等。往其懋哉。可。

柴元謹衛尉寺丞制

勅某。商之有征久矣。所以銷沮游末而勸之力本。非特收其贏財佐公上之急而已也。爾勤其事。以有累日之功。序進一官。以從大雅無德不報之義。爾維世族。尙克勉哉。可。

奏舉人前梓州郫縣主簿陳巨卿衛尉寺丞奏舉人前權復州軍事推官孫琬大理寺丞制

勅某。選於吏部者多矣。非使在位者舉其類。則善人豈能自進乎。爾能勵厥官以多薦者。丞于卿寺。其愈祇修可。

張服尹忠恕張慎言孫昱太子中舍制

勅某。周官三歲則大計羣吏之治而誅賞之。故朕時憲以爲考績之法。夫吏者三歲能率職礪行而無罪悔。是宜有賞。序官一等。以慰爾勞。維爾良能。宜加報稱。可。

薛昌弼雷宋臣太子中舍劉師旦殿中丞制

勅某。審宜考課之法。成於先帝之時。朕維奉循以職名器。無有親疏遠近。使有司一是以待之。嘉爾有勞。



序遷一等。勉共爾位。率志忘私。庶乎能稱爵賞之公。而終無尤於職事。可。

方蘋高安世張湜傳充並太子中舍制

勅某等。吾於爵祿甚慎。閔仁百姓甚篤。爾等或專一縣。或佐一軍。而皆列於卿丞之籍。蓋嘗有所試矣。今有司序功。當得遷位。吾雖甚慎爵祿。而於爾等無所愛焉。其勉思拊循百姓。以稱吾閔仁甚篤之意。可。

黃汾太子中舍制

勅某。吾擢天下之才而立民。長伯萬家之縣。又有戎馬之任焉。其稱甚難。而爾能其事。有勞遷秩。毋廢爾成。可。

王塾太子中舍制

勅某。爾丞于理。亦既三年。有職事之勞。無行義之過。使遷厥位。著籍外廷。夫與於燕而坐於朝。報禮亦云異矣。往祇乃服。其可不思。可。

奏舉人前永興軍節度掌書記王申等太子中允制

勅某等。皆以藝文起家。而久於常選。才能行義。數見推稱。揚于朝廷。各命以位。往共厥服。可不勉哉。可。

雷宋臣太子洗馬制

勅某。周人事神以諱。而不諱嫌名。持循至今。遂著爲律。爾以難避之諱。而辭當拜之官。自言冒榮。有所不忍。其更位號。以慰孝思。慎爾百爲。勉求稱此。可。

熊本著作佐郎制

勅某。吾歲取吏部之選者。以爲宮監省寺之官。常不啻乎百人。論者患其多焉。詩不云乎。濟濟多士。文王以寧。有天下者。豈以士多爲患哉。顧其所取何如爾。汝藝文政事。皆見稱述。往踐祿次。蓋將有補於時。使人視吾所取。而不以爲多在。汝勉之而已可。

高旦著作佐郎制

勅某。唐虞以三考黜陟幽明。而其所命或終身於一職。然則其所謂陟者。蓋爵服之加而已。今之增位。猶古之加爵服也。以爾久於職事。而功用應於有司之法。故使增位以報焉。雖考績之歲月。與黜陟之方。古今不同。而吾所以褒勵庶工。非與唐虞異義。爾其毋怠。思稱厥官可。

國子監直講孫思恭著作佐郎制

勅某。爾才能行義。有超卓之譽於時。故遷於衆。以教國子。而又寵以校讎之官。有司稽勞。當得遷位。列職東觀。往其懋哉可。

奏舉人前祁州深澤縣令王廣廉著作佐郎制

勅某。爾用舉者爲縣。又能修其職事。而舉者衆多。升序厥官。屬之東觀。夫士之有能有爲也。豈必戒敕而後勉哉。爾以才稱。其知自勸矣可。

奏舉人編校昭文館書籍孫覺著作佐郎制

先帝置校讎之官。所取皆天下望士。爾惇行力學。爲時俊傑。治民有紀。稱者衆多。會課進遷。往共厥服可。奏舉人姚闢著作佐郎制

勅某祕書省有著作之官。所以待藝文之士。爾瞻辭博學。而爲吏有聲。甄績序材。以登茲選。往共職服。其亦勉哉可。

奏舉人游烈等著作佐郎制

勅某等。皆以藝文起家。而久於常選。才能行義。數見推稱。揚于朝廷。各命以位。往共厥服。可不勉哉可。

奏舉人張公庠著作佐郎制

勅某爾嘗爲令。而能以材譎爲在勢所稱。寘諸京官。以懋乃績。往踐祿次。愈其勉哉可。

高膚敏崇大年並著作佐郎制

勅某爾等皆以才能序于莫府。舉其職事。稱者衆多。會課超遷。往其祗服可。

潘及甫著作佐郎制

勅某等。選於吏部久矣。皆能以才自奮。爲在位者所稱。稽狀有司。列官省寺。往須器使。無替厥修可。

奏舉人阮邈著作佐郎馬好賢大理寺丞制

勅某等。省寺之有丞郎。其名位高下不同。而於今皆爲遴選。爾等從事于外。以能見稱。有司書勞。朕所親覽。各踐厥位。往惟慎哉可。

直講劉仲章大理寺丞制

勅某爾方以經術教國子。而有司會課。當得進遷。爾以通經發聞於世。允蹈所學。尙何訓哉可。

施遜大理寺丞制

勅某三歲一遷。朝廷之法。爾共其職事。在法當遷。往懋厥修。以祇朕訓。可。

奏舉人周同大理寺丞制

勅某。爾能勤厥官。以有舉者。有司條奏。在法宜遷。使得傳籍於審官。以爲大理之屬。當知夫名器之不可。以徒得也。往思懋勉。以稱之。可。

吳安操大理寺丞制

勅某。爾名臣之家。能自修飭。考論功最。當得進遷。往服官成。勿墮所守。可。

高定大理寺丞制

勅某。朕布功賞之信。苟有功。可以中率。則無擇小大遠邇而加焉。今有司條奏爾勞。在法當賞。往丞于理。其懋厥官。可。

林宗言大理寺丞制

勅某。有司言爾當遷。而朕視功狀。如有司之言。故使遷爾位一等。吾嘗詔有司。以時視士大夫功狀。而敘進之。毋使自言。欲夫在位。知有禮讓。而不以官爲利也。爾知之矣。可不勉哉。可。

徐縝大理寺丞制

勅某。爾出於世祿之家。而服勤筦庫之事。行不愆於法。才不曠其官。遷以報功。往其思勗。可。

李文卿大理寺丞制

勅某。吏之近民者。莫如令。故位非高也。祿非多也。而吾不輕以與人。爾得爲之。以有稱者。往施於政。又以

才稱。實諸京官。以待任使。思永終譽。厥惟勉哉。可。

奏舉人陳仲成大理寺丞制

勅某。歎之爲州也。窮於山谷之間。吏常患乎州窮。而刺舉者有所不知。爾勤其官而稱者甚衆。可謂能矣。其進以爲京官。往懋乃成。以終有譽。可。

張誼大理寺丞制

勅某。古之爵賞。與士共之。雖有衆譽。而功實不副焉。亦不可以幸而得也。此吾所以閱稱舉之衆。而又稽歷試之勞。然後命爾以丞于大理也。夫去吏部之選。而有錄於審官。能祇慎不懈。以免於文吏之議。則雖高位尙可以循而至。可不勉哉。可。

鄭民表韓燁大理寺丞制

勅某。爾服勞州縣。才譖見稱。甄序厥功。使丞于理。往祇休命。惟旣爾心。可。

吳太元大理寺丞制

勅某。審官之法。三歲一遷。爾嘗有罪。故使序于大理。四年而後遷。以爲丞。賞誅黜陟。吾無私焉。皆爾自取也。施於有政。可不勉哉。可。

奏舉人劉公臣白贄並大理寺丞制

勅某等。今吾大吏舉非其人。有坐斥廢。其於舉人。豈顧不慎哉。然而坐斥廢者。時時有之。此殆求舉者不一。其始終以負之爾。今爾等皆以衆舉。故吾命以京官。勉思一其始終。以無負於舉者。可。

國子監直講編校集賢院書籍錢藻大理寺丞制

勅某。朕設科以招方正之士。而爾應其求。置局以儲雋乂之材。而爾充其選。有司會課。當得進官。若爾之諒直多聞。方且善其行。以爲時用。往祗厥位。可不勉哉。可。

段叔獻大理寺丞制

勅某。以爾典京師之獄。滿歲於此矣。而未嘗有失。丞于卿位。以懋爾勞。維朕哀矜庶獄之有不幸。爾所知也。守爾常操。尙無誤哉。可。

奏舉人于觀大理寺丞制

勅某。方今漕頻海之鹽。以食東南。而收其息。以佐有司之急。倉庾之官。一失職。而至於耗惡。則足以匱國而傷民。故稱舉能吏而待之厚賞。所以勸也。爾從其事。能有成勞。丞於理官。往踐無懈。可。

馮翊辛景賢大理寺丞制

先帝使大吏推舉常選之士。以補省寺之屬。爾能脩其職事。而舉者衆多。率由舊章。命爾以位。往祗厥服。以稱甄升。可。

試大理司直兼監察御史朱柬之大理寺丞制

勅某。爾以幹口謹潔。能舉其職事。而屢爲在位者所舉。歲滿序功。法宜有賞。理官之屬。其往懋哉。可。

陳確大理寺檢法官制

勅某。朕制中典以刑四方。非惟不失天下之姦。唯以使人無犯有司而已。今明試爾才之可使。而後以爲

屬於理官。爾其知恤庶獄之不辜。而求所以出之。以稱朕哀矜元元之意。可。

魏綏大理評事制

勅某。爾備屬奉常。亦已久矣。序進厥等。以旌有勞。夫三歲一遷。雖厚祿可以馴而致。欲爲善者。亦如此矣。能積智累勤而不已。則亦何所不至乎。在爾勉之。以求爲可進也。可。

石祖良大理評事制

勅某。士之有籍於審官者。皆三歲而一遷。今爾歲滿。故吾進爾位。加爾祿。夫祿以等功。而不以志。位以序德。而不以勞。爾世厥家。其知勉矣。可。

應才識兼茂明於體用科守河南府福昌縣主簿蘇軾大理評事制

勅某。爾方尙少。已能博考羣書。而深言當世之務。才能之異。志力之強。亦足以觀矣。其使序于大理。吾將試爾從政之才。夫士之強學贍辭。必知要然後不違於道。擇爾所聞。而守之以要。則將無施而不稱矣。可不勉哉。可。

何景先何景元並大理評事制

勅某。春秋之義。以貴治賤。以賢治不肖。今天下人民之衆。賢者不爲不多。爾得列于京官。其賢於人。宜如何也。今爾累日之課。又當遷序其位。亦云不賤矣。其爲賢也。亦可以勉哉。可。

張璠大理評事制

勅某。吾推恩大臣之子。爾得列於祠官。能任事而有勞。其以備士官之屬。爾父起於閭巷。以能大其家室。

者。豈一日之力哉。爾惟積勤累善。法象而不違。則豈特有慶于而宗。又將有賞于而國。可。

前鄉貢進士許將大理評事簽書昭慶軍節度判官廳公事制

先帝親第進士於廷。而以爾爲第一。爾於藝文。可謂能矣。所以施於政者。朕將有所試而觀焉。夫士之遇時。不患無位。思所以立。往其勵勉。以副東求。可。



紅日 益院 抄史  
際公 博系 內圖書

上海圖書館

上海图书馆藏书



A541 212 0004 0765B

